

PORAIANI KI-TAP IV

Published by —
Tura Book Room
West Garo-Hills, Tura
(Meghalaya)
1995

PORAIANI KI TAP IV

GARO READER IV

TURA BOOK ROOM

West Garo Hills, Tura

S. B.

© copyright


Reprinted : 1959, 1963, 1975, 1977,
1990, 1993, 1995.

495.4

POR.4

Printed by -

M. K. Das



LESSONRANG

- | No. | HEADINGS |
|-----|--|
| 1 | Duke aro Matchuko Moanggipa Bi'sa |
| 2 | Gisik Gnanggipa Montri Sakbri |
| 3 | Goldilocks aro Sonani Mukut |
| 4 | Karini Chi'a |
| 5 | Ka'saninggijagipa Bi'sa |
| 6 | Rasong Gnangatgipa Asilik |
| 7 | West Indiani Chichang- rang |
| 8 | Nang-pako Nang'ni Nikchotara Basako ? |
| 9 | Androcles aro Singho |
| 10 | Meserangni Melaa |
| 11 | Joan of Arc |
| 12 | Sipai Kotokko Katpilat- gipa Bi'sa |
| 13 | British West Indiani Chichangrang |
| 14 | Dakgrikani Jahatrang |
| 15 | Newfoundland |
| 16 | Alpaca |
| 17 | Dikdiksa Ka'onangani |
| 18 | Pyramidrang |
| 19 | Kangalni Chanchiani- rang |
| 20 | Matchako Sikar Ka ani |
| 21 | Mongmako Rim'ani |
| 22 | Alexander the Great |
| 23 | Greenland |
| 24 | Muktako Am'ani |
| 25 | Josephko Palata |
| 26 | Alfred the Great |
| 27 | A'ako Dakani |

No. HEADINGS

- 28 Englishrangni Americao
 Songdongani: I
 29 " II
 30 Rowan
 31 Timur Ja·kora
 32 Mose
 33 Shah Jehan: I
 34 " II
 35 Sagal
 36 Miranda
 37 Gisik Gnanggipa Ri-
 chardni Agana
 38 Franceo Dakgrikaona
 A·chikrangni Re·angani
 39 Franceni Dakgrikramo
 A·chikrangni
 Kam Ka'a: I
 40 " II
 41 Simano Atchia

PORAIANI KI-TAP IV

Lesson 1: Duke Aro Matchuko Moanggipa Bi'sa

Changaso saksas duke matchu bima mangsako bree, uko sal gipino moangchina bi'sa saksao don-angaha. Sal gipino ua bi'sa matchuko dukeni nokona moangengachim. Unon duke rama tong-sao ua bi'sako gronge an'tangni, brebagipara matchu namchongmota, aro ua bi'sade ua matchuko saksan mobana ambrejaenga ine nikaha. Unon ua bi'sa dukeko aganaha, 'Na'a ia matchuko moangna angna dakchakpabode.' 'Na'asa man'oba man'jaoba saksan moangbo' ine duke aganchakaha. 'Ia matchuko dukeni nokona moangna na'a angna dakchakode, ia matchuko moangani gimin anga badita man'a, uni samsakode anga nang'na on'genchim' ine bi'sa agantaiaha. 'Duke namgipa aro ka'sagipa mande ong'a, aro an'tangni nokona maikoba ra'angode, boksis on'rongako nikjama?' ine bi'sa aganaha. Unon duke an'tangni matchuko moangna dakchakpaaha. Uamang sakgnian moangaha. Nokona sepangahaoa duke ja'man dongrikemung, rama gipinko re'ange nokchina napangemung, uni nokol saksako okame, matchuko mobagipa bi'sana on'china ine uni jako tangka gongchi'bongako on'aha. Bakbakan nokoni ong'katangpile, rama tong'sao ua bi'sani noktangchina re'pilbaako sengsoaha. 'Duke nang'na paisako on'atahama?' ine duke aganaha. 'Oe, iara maisa, ha, nang'ni palko ra'boha' ine bi'sa agane una ana dokko on'aha. 'Duke nang'na anna chi'gnikosan

on'aiahane?' ine duke singaha. 'Oe, inditara chu'ongjama? ian bang'ahake, ine bi'sa aganchakaha. 'Oe, chu'onga chu'ongade, indiba dukede nang'nade indita mangmangde on'atjaenggen, on'atskagiparangsa gualengnaba donga. Hai, re'emung sing'e nitaina' ine Duke aganaha.

'Re'angjaha eba angade, ian chu'ongaha, maina nalis ka'a gita ukoa?' ine bi'sa aganchakaha. 'Nalis ka'a ong'ja mangja, ang baksa re'bo, hai,' ine duke aganaha.

Nokona sokangon duke gam'bee do'gacholni gantiko salataha. 'Maisa, na'ade gantiko gam'bee salata, tango ka'onangosai!' ine bi'sa aganaha. Bakbakan saksu nokol ong'katbaaha. Nokni pilak noklorang sarao tom'dakbachina ine duke aganataha. Unon pilakan re'batokahaoa, 'Badia mande nang'na ana chi'gniko on'aha, mesokbo bi'sa ine duke aganaha.' Unon ba'ra gipokko gandapgipa nokol saksako bi'sa mesokaha. 'Angni namgija dosko ka'sapae watpabo' ine nokol a'ao ga'ake dukeo mol'molaha. 'Na'a nang'ni kamoni chel'angenaha' ine duke aganaha. Iarang ong'engmitingo bi'sade namen kenbee mamungkoba aganna chang-japilaha. Unon aditani ja'manosa.' Na'an duke chong'motma? Angni nang'ko matchu moatani gimin na'a angko ka'onangjawama?' ine bi'sa singaha. 'Oe, angan duke, anga nang'ko mamungba ka'onangja, indiba nang'ni bebe dakachi namgijagipa mandeko bikotna man'ahani gimin anga kusi ong'beaha' ine duke aganaha.

Lesson 2: Gisik Gnanggipa Montri Sakbri

Benares songjinmao donggipa saksa rajao gisik gnangbegipa montri sakbri gnangchim. Changsao raja mainiba gimin an'tangni raiotrangni kosako jringipa kajinako bariatna dakon, ua montri sakbri uandake dakjachina rajako beng'aha. Uni gimin raja namen ka'onangbee ua montri sakbrini pilak gam aro kamkoba ra'seke uamangko a'rikataha.

Montri sakbrian damsan ku'monge Benaresoni re'angmitingo ramao uamangna skang skang re'sogipa ut mangsani ja'kolko nikaha. Uamang sakbrian ua utni gimin agangrike re'angengachim. Unon saksa badinggipa uamangona re'bae, an'tangni utko gimaataha ine uamangna aganaha. Unon saksa montri aganaha 'Nang'ni utara jakrachini mikron mikkellengaba.' Sakgipin aganaha, 'Ki'meba kan'dikbeakonba.' Gitamgipa aganaha, 'Ja'aba samsa koraba.' Bon'kamgipa aganaha, 'Okba saengake ura.' 'Chinga pilakan uko nikbakuja, indiba ia an'chengo chinga ja'kolko nikaha' ine montrirang aganaha. 'Maisa indide, na'simanga angna baten aganna changbatake, na'simang nikchongmoten pale ra'chongmotaha. Anga na'simangko rajao nalis ka'gen' ine badinggipa ka'onange aganaha. Indaken ua dakaba dakbebeaha. Raja ua montri sakbriko bebeko aganjaode patoko dongen ine kenate aganaha, 'Na'simang ua utko mamung saloba nikkujaode maikaisa uan ja'kora, kana, ki'me kan'dika aro ok saa ine aganna man'aha?' 'Ja'a samgitamni jakolkosan anga mongsong

nikaha; uni gimin ja'a samsade ja'koral' ine anga chanchia ine montri saksa aganaha. 'Rama samtangtangchi samsi chagiparangni gisepo re'angmitingo ut mongsongde rama jakasichini samrangkosan chiksote cha'angaha, rama jakrachikode mamungkoba cha'jaha; uni gimin uan jakrachini mikron kana ong'a ine anga chanchia' ine montri sakgipin aganaha. 'Gisep gisep utni rama ja'kol dingtang dingtang ong'e, an'chi tingtotako nikaha, aro uko tampi chikarangni an'chi gita nika; uni gimin ua utni ki'me ro'jani giminsan ua be'en gimikni tampiko dokponge a'rikna man'jae, tampirang uko indake chikaha ine anga chanchia' ine gitangipa montri aganaha. 'Utni ja'kolko nion uni jak samgnini ja'kol badita tu'a, uni ja'a samgni namgipani ja'kolara indita tu'ja ine anga nikaha; uni gimin ja'ara be'enni ning'o maiba saknaachi salrikako man'ani giminsa, bilonge ga'na man'ja ine anga nika; uni giminsa ok saa gnanng ine anga uia' ine brigipa montri aganaha.

Iarangko knaon raja an'tangni montri sakbrini gisik gnanganini gimin aiao inmanpilaha. Aro, 'Raiotrangni kosako angni mangsonga gita jrimgipa kajanako gatjana na'simangni beng'ara namgninasa ong'chongmota' ine raja aganaha. Ua jrimgipa kajinako rang'san galpile, uamango kema bi'e, uamangko kamtangtango donpilaha, aro pangnan uamangni nama skianiko ra'chake kamko ka'angna ku'rachakaha.

Lesson 3: Goldilocks aro Sonani Mukut

Ruuta bilsa re'angaha, saksa mes nirike cha'gipa mande an'tangni jikgipa aro an'tangni de bi'sa saksa baksa dal'begipa burung bolgrimo bolchi rikgipa noko dongachim. Uni degipani knia rimita aro ro'a, aro ching'chet ching'chet dakachim. Uni gimin uko Goldilocks, chong'motan Kni Sona ine mingachim. Wal sao ua pagipako nichaksona burung bolgrimona re'angaha, indiba ua rama brangahani gimin noktangona sokbapilna amjaha. Unochacha sin'kari a'bachengani salransan ong'-engpitini gimin burungo ma'manti biterang bang'-beachim. Uni gimin Goldilocks uarangkon cha'e an'tangko okkaataha. Sal gittamna kingking brang-oroani ja'mano ua namen diltubegipa a'bimandu biapona sokangaha. Uano bolrang bing'beani gimin ua uarangni gisepe re'nan jokjapilaha. Indiba indake re'angon re'angon bolrang eng'angaha, aro Goldilocks tangsimgipa sagalni chi rikamona sokeaha. Unon na'tok rim'gipa adita manderang an'tangmangni ringko rikamchina salbapilengachim. Unon uamangoni saksa Goldilocksko nikate aganaha, 'Aiao, maikai nitobegipa bi'sa! An'ching uko an'chingni ringo rimna hai, maina an'chingna bi'sa saksako nangchongmota.' Goldilocks an'tangni ma'a paani dongramko niktaina ka'dongjahani gimin namen duk man'bee na'tok rim'giparang baksa re'angpana namnikaha. Na'tok rim'giparang ruutana kingking uamangni chekrangko goe na'tokko rim'ahaoba, uamang mangsaba man'jaha. Uni gimin saksa kni bokgipa mande chekko Goldilocksna on'e aganaha, 'Dao na'a joton ka'skae nibo.

Haida na'an rasong dongkalnaba donga.' Goldilocks mamung saloba na'tokkō rim'pakujani gimin chekko galna changjachim. Uni gimin ua bil'dikbil-dak dake galataha. Unon tu'bea ka'machi rong-brako maioba nangkangea gita dakaha. An'tang changgijani gimin kratcha'a gnang Goldilocks chekko krenge saldoaha. Saldobaon uko jrimbea gita nikaha. Kosakona sokbasrangoa sonani mukut cheko nangbaako nikaha. 'Salam, O raja' ine budepa Goldilocksni mikkango ja'sku dipane uko salam ka'e aganaha, 'Da'o bilsa ritcha sana batangaha, chingni bon'kamgipa raja sianghachim. Uni siangmitingo uni pal raja ong'riknasigipa mande pilakba griani gimin ua an'tangni mukutko sagalo galataha. Basakoba saoba rasong gnanggipa mande ua mukutko chini ning'oniko kolame man'jana kingking pilakba uni biapo raja dongjasrangchina ine aganaha. 'Dao na'an ua mukutko man'ahani gimin, na'an chingni raja ong'aha.' Unon na'tok rim'giparang ringko a'gachina choangaha, aro Goldilocks sonani ching'gipa mukutko stike ringni mikkangchi chadengeaha. Goldilocksni sonani mukutko man'ani katako ring saoni ring saona knarikrikatangaha, aro a'ga gimikchinan bakbakan gipangaha. Aro hajal hajal manderang jako bol cheksirangko ra'e uko grongna re'baha. Ramarango bibalrangko sataha. Dal'gipa namgipa songjinmani jatchio donggipa nambegipa rajani nokona sokangoa, uko raja ine pilakchin mingsingataha. Goldilocks bakbakan ua dal'gipa burung bolgrimoniko an'tangni ma'a paako am'china an'tangni nambatgipa hajal sa sipairangko watataha. Sipairang antisani ja'manon, Goldilocksni ma'a paako rime rajani nokona re'bapilaha. Uamangni

degipa Goldilocksni rasong man'ani katako knaon uni ma'a paa bebera'nan man'japilaha. Indiba rajani nokona sokbaon, Goldilocksko singhasono asongengako aro uni samtangtangchi chadengdulgipa monrirangko nikon uamang bebera'gija dongna man'jaha.

Lesson 4: Karini Chi'a

'A'gilsako pilakna bate chi'batgipara mai?' ine sal sao saksa mande an'tangni demechik sakgnio sing'aha. 'Chini' ine demechik dal'batkalgipa agan'aha. 'Kari' ine demechik chonkalgipa aganska'aha. Pagipa skangde demechik chonkalgipani agan'ako nachilake roenga inesa chanchiachim. Indiba uan an'tangni chanchia gita karikon chi'bata ine krenge jeani gimin uamangni gisepo ka'onange jegrikani ong'srangaha. Pagipa demechik chonkalgipako ka'onange uko an'tang nokoniko a'rikat'srangaha. Unochacha ding'kari ong'ani gimin, walo rona nambeachim. Ua nitogipa me'chik bi'sa an'tang pagipani nok sambao donggipa burung bolgrimo saksan asonge gitko ring'aha. Indakmitingo saksa rajani depante sikar ka'e rama brangemung uko re'baengachim. Uan ua me'trani git ring'ako knae uno rama sing'na ine uona re'baha. Sepangona sokbae ua me'trani nitoako nikoa ua una mikcha'aha. Unon ua uko an'tangni nokona rimangaha. Bia ka'ani sal sokahaoa, ua me'chik bi'sa an'a tangko mamungba uiatgija uni ma'a paakoba bik'a'ani alaona okamatpaha. Bia ka'ani alaona pilak manderang sokbahaoa, tarisogimin ma'manti song'gimin cha'anirangko ra'bana a'bachengaha. Indiba

uarang pilakon kari grichim. Sokgiparang pilakan cha'na a'bachengoa pilak song'aragon kari gri ine nikaha. Uni gimin uamang uarangko kari pue song'ahaode mairongpile tobegipa bijakrang ong'gnokchim ine aganmitugrikna a'bachengaha. Indaken ja'manoa paraken, karian grike ine jena a'bachengaha. Unon ua me'chikni pagipa aganaha, 'Beben karian chi'batgipa ong'bebea, kari gride jegita nama toakoba toatja aro su'uatja. Changsao angni demechik chongipa, karian chi'batgipa ong'a ine angna aganahachim, indiba unode anga uni aganako namnikjae batesa uni kosako ka'onange uko nokonikon a'rikatsrangman'aha. Indiba da'alo anga iani gimin namen duk man'bea. Anga angni gualako nikchongmotaha. Da'alo anga angni a'rikatgimin demechikko niktaina man'genchimode, anga an'tangni namgijani gimin uo kema bi'genchim ' Unon demechik chongipa an'tangni bia ka'ani ba'ra iluru-aniko kike gale pagipaona re'bae uko ku'dimeaha. Aro indake an'tangko uiatani ja'mano nanga gita kari pue song'gimin ma'manti namnama cha'ani-rangko ra'baataha, unon okamgimin manderang pilakan cha'e katchatokaha, aro ua me'chik bi'sako mitelaha. Pagipa an'tangni demechikni rasong man'ako nike namen kusi ong'beaha.

Lesson 5: Ka'saninggijagipa Bi'sa

1. Che! che! na'a maiko daka, re'babo an'pile,
Chanchikubo an'tang kamko na'a chadeng-
dike.
Cha'u ong'ja indioba cha'ugipa gitan,
Ka'sne ka'sne ga'chokchima ja'kuanti ga'an.
2. Salni ding'a samrang dika kengni dongoba,
Chombuenga dongdip dongdip jakko ba-
wangenba,
Rim'na ine kal'e rona dos grigipa gukko,
Kene bile katenggipa gukchru gukaljepko.
3. Be'ninggipa ja'si jaksi ba'begipa grangrang,
Gitchak tangsek kongtok daka nitogipa
gukrang.
Dakgipa Jihova Isol u'rangko rakia,
Wa'jak, samjak bolni bijak' u'iang cha'e
tanga.
4. Che! che! na'a ka'sagija as'lik jong'memako,
Toka rim'a ja'si aka gukarengni jatko.
Chibrim ajengjorang aro kompru badopaba,
Kusi ong'e jakgitele rochina u'rangba.
5. Ringring ganti jong'gilwengrang bolgrim
andalao,
Olweng olweng chenggarimu jingjingbeng-
rang salo,
A'gilsakko a'dingatna bilsa karitango,
Ring'mitela gisik nange dakgipa Isolko.

6. Indiode maina na'a pilak gukko jo'ng'ko,
 Dukko on'a ka'sagija Isolni dakako.
 Gukrang jong'rang chona rema a'gilsakna
 maiba,
 Namginina ong'a inen Isolde dakaba.

Lesson 6: Rasong Gnangatgipa Asilik

Franceo saksa mande sal sao songjinmani sorok-rango rojojomingo saksa ruti dagkipani dokano. namen nitobee tarie daggimin mingsa cha'aniko nikaha. Uan an'tangni demechik chongipako kusi ong'atbeani ong'gen ine chanchie ua napange uko ra'eaha. Paisa on'pilako man'na ine ua sengtim-engachim. Unon saksa kangalbegipa gita nikgipa, indiba adita rongtale gangipa bi'sa, uanona napbae ruti dagkipani jikgipana aganeaha, 'Ruti dotsa ra'e-china ine ama angko watataha, ambi.' 'Baosa paisa ra'baama?' ine ua ruti dotdalbeako bi'sani jako on'ate ka'dingsike sing'aha. Ua bi'sa aganchakaha, 'Dongja, ambi, indiba ama an'tangan knalo re'bae nang baksa agangrikenakana.' 'Ra, rutiko ra'e re'angbo' ine ruti dagkipani jikgipa aganaha. 'De, nama' ine bi'sa aganaha. Skang bresogipa mandeba an'tangni paisa man'pilna nangako man'ahaenba unoni re'angna dakengachim. Unon ua bi'sako an'tangni ki'sangchi chadenge dongengako nikaha. 'Maise, da'oba na'a re'angkujama? Ruti on'atakon namnikkujama?' ine ruti dagkipani jikgipa sing'aha. 'Aiao, namnikjokai' ine bi'sa aganchakaha. 'Indides nang'mana ra'anggalgalbo, ruutangode nang'ko manenggen' ine me'chik aganaha. Bi'sa uni aganako

knagija gita, aro maichiba jada ong'atako man'aha gita chadengchaaha. Me'chik uni sepangona re'ange uni perangko doktoptope roe aganaha, 'Na'ara maikosa jumang nikenga da'ora?' 'Ambi, iano sawasa git ringenga?' ine bi'sa sing'aha. Me'chik knatime aganaha, 'Pilakba gri.' Me'chik aro ua mande sakgnian knatimaha, indiba uamang ruti dake palgiparangni noko knaronga gita adita asilikrangni mikoakosan knaariaha. 'Ian do'o, ong'jaode chankolo rutirangan mikoengnaba donga' ine bi'sa aganaha. 'Me'chik ka'dinge' asilikna agre mamungba ong'ja' ine aganaha.

'Asilik, aiao, ua asilik bebema? Ambi, na'a ua asilikko mangsa mangmang on'atode anga nam-nikgen,' ine bi'sa aganaha. 'Nang'nara maina asilikko nanga? angade angni noko gnang kakketkoba on'atna namnikgenchim' ine me'chik aganaha. 'O ambi, ka'sapae mangsa mangmang on'pabo; maina noko asilik gnangode nokni rasong nama ine saoba saoba angna aganaha. Uni gimin chingni noko asilik mangsa dongpaode, chingni nokoba kusi ong'ani dongpanaba donga, aro haida duk man'gipa aro graprongenggipa angni ma'gipaba pangnan grapna aro duk man'na nanggija kusi ong'aniko man'panaba, donga' ine bi'sa aganaha.

Dongpaenggipa mande ruti dagkipani jikgipachiko niatoa, uni mikrononi mikchiko ipakengako nikaha. 'Nang'mara maina grapronga, mande bi'sa?' ine ua mande ka'saa gnang sing'aha. 'Cha'anini gimin na'a; apara sijok, aro amara chingko alduna neng'bee kamko ka'na nanga, uni gimin duk man'ronga aro grapronga' ine ua bi'sa aganaha. Dongpaenggipa mande ua bi'sako de'tome gipakaha. Me'chik ruti dakramchi re'ange, ua an'tangan

asilikrangko dangtapna kenoba, an'tangni segipako mangbii rim'ate, sunduk chonbeao uarangna rang'sittona gita a'kol chonchone puemung uarangko chipe on'ataha. Bi'sa uko ra'e kusi ong'bee re'angaha.

Uni re'angmano, dongpagipa mande, aro ua me'chik sakgnian, 'Da'nang! kangal bi'sa,' ine aganaha. Me'chik an'tangni sechakaniona re'ange, segrini ruti ra'chakaniko see rakiani kitapko oe, ka'mao, dam man'aha ine see donaha. Ua me'asaba an'tangni jepo donga gimikkon bikote ua me'chikni jako on'e aganaha, 'Na'a ka'sapae ia tangkarangko ra'chakrikemung, ua kangal segrina on'atpabo, aro basakoba salsasiko uni degipa mande ong'e una kusi ong'ani aro dakchakani ong'chongmotgen ine on'tisa see uiatpabo.'

Me'chik ua mandeni mol'mola gita dakaha. Ruti dakgipa an'tangni degipani jako ua tangkako on'ataha, aro ua bi'sa uko katdimdime ra'ange rutiko ra'anggipa bi'sana skangan soksochengaha.

Rutiko ra'anggipa bi'sa nokona sokangon, pagipani siantaltal un salosan ma'gipako kusi ong'e nikechengaha. Uan mamungkoba uipajaenba, uni asilik ra'baani giminan uamangni noko kusi ong'ani a'bachengbaaha ine chanchiaha. Uan beben ong'a. Ua asilikrangko man'na gita bi'sa an'tangni dukni katarangko parakatjahaode, uamangni obostara mamung saloba indake dingtang ong'galgaljawa-chim.

Lesson 7: West Indiani Chichangrang

West Indiani chichangranga North aro South Americani gisepo donggipa bang'bea chichang jinmarang ong'a. Uarang Floridaoni Orinoco chibimani bibra aro Venezuelani rikamrangona soka, aro samsachi Atlantic sagal, aro samgipinchi Gulf of Mexico aro Caribbean sagalni gisepo donggipa champengani gita ong'a. Columbus an'tangni choangchengao San Salvadorni rikamona sokangon ua iarangko saliramni India ine mingaha; maina ua guale, ua chichang aro uni sepango donggiparangkon Indiani sepangbeao donggiparang ine chanchiaha. Ua a'gilsak gimikkon ong'nasipile chodulman'aha ine chanchiaha. West Indiani chichangranga bak gittam gnang.

1. Bahamarang, uarang salgrochi donggipa chichangrang ong'a, aro mongsongde uaranga coral jo'ongiangni rikgimin ong'a.

2. Greater Artillerang, chong'motan Cuba, Haiti, Portorico aro Jamaica, iarang dal'dalbatgipa chichang ge'bri ong'a. Uano adita chugipa ga'nanggijagipa a'brirang gnang.

3. Lesser Antillerang, uaranga salgipengchi ong'a. Aro uarangoni mitam wa'alni abrini ku'chotrang ong'a. Uarangkoa Leeward Islands aro Windward Islands dake bak daktaiaha. Leeward Islands Portoricooni Martiniqueona; aro Windward Islands Martiniqueni Trinidadona soka. Windward aro Leeward ia bimungranga ua chichangrangni balwako mikkangchaka aro baljanggil ong'ako mesokna uandake minga. Uarangni bimungrangan ua chichangrangni balmikkango

aro baljanggilo dongako mesoka. Ia pilak chichangrangni gisepe skanggipa dolni chichangrang, gnigipa dolni Jamaica chichang aro gittamgipa dolni bang'bata chichangrangnan British-rangni ong'a. Gipinrangoni Haiti jakgitelgipa ong'a, aro Cubara United Statesni ong'a. Uarangna agre pilakan Europeni dingtang dingtang a'songrangni ningo ong'a. Lesser Antillerangoni ga'nanggijagipa chugipa salaramni rikamranga ta'arakgipa balwa aro Equatorchini ta'rake jokbagipa aro ding'gipa chichina mikkangchakgipa ong'ani gimin jahatranko kana namgipa sagal noksikrangko ong'atpila. Bahama chichangrangni salgrobatgiparangna agrede ua chichangranga gimikan Torrid Zonen ningo ong'ani gimin pilakon ding'a. Indiba ding'gipa a'songrango gita rang'sitsokatjapile duga ding'ja; maina iaro samtangtangchi donggipa chugipa a'achi, aro salgrochi balgipa ka'singipa balwachi uarang on'tisa rongdimatako man'a. Uarango a'rankari, aro wachikari, ia kari minggnisan donga. A'rankaria Novemberoni Aprilona, aro wachikaria Apriloni Novemberona ong'a. A'rankario aram gri, salgi tangsima aro balwa rongtala, indiba wachikario mikka waa aro mikka kimpretan bilonga. Wachikario sagal rikamjolni ongipa biaprango rokomsa holdiasob saronga, indiba ning'tuachi a'bri dakgipa biaprango on'tisa an'sengkala. Chubatgipa a'brirangoba suurikode mamungsaloba nikja. Ding'a a'songrango chagipa bang'bata bolrangan, ua songo chakamgipa ong'oba ongjaoba, nanga gita salni ding'a aro mikka wadapako man'ani gimin namen silbea. Moslarang, chi'begipa biterang aro gamchatgipa bolrang ge'gijan chaaua. Grit, coffee, cocoa, ta'maku aro kilrangko gipin

songchi on'atna ine bang'en ge'a. Me'arakuko pilakon ong'nasipile ge'a, aro ua namen silbea. Biterangni gisepo ramrambatgiparanga dalim, anaros, cheng, narikel, te'gatchu, narang, te'matchi, aro te'rikranan ong'a. Sepango donggipa a'a dal'gipao ramram donggipa dal'kalgipa matburung-rang iano dongja. Andalako namnikgipa do'-bakrangde bang'a. Nitogipa kimilrang gnanggipa do'sikrang aro ma'manti knatoe mikogipa do'orang bang'bea. Ma'manti jo'ongrangba donga, aro sagal rikamrango ki'singrangba bang'bea.

Lesson 8: Nang'pako Nang'ni Nikchotara Basako?

Colonel Sidney rajana bamgipa, ka'donggipa nitogipa aro kusi ong'gipa mande ong'achim; aro uni ka'sachake dakrongani gimin pilakan uko mandera'achim. Uni depante chongipa uko Isolko gita chacha maniachim.

Rajana bobil dakgipa Puritanrangna kene, pagipani dongnumitingo, aro Puritanrang uko uni nokoniko je somoioba am'enaba donga ine ma'gipani kenchaksoengmitingo, pagipani dongnuani biapko mamungba aganpajawa ine ua bi'sa chongipa chanchisoengachim. Puritanrang re'bae Colonel Sidneyko nokoniko am'rikite niengmitingo, uamang bakbakan an'tangkoba sing'gen, aro ua an'tangni pagipako jokatna nanggen ine ua bi'sa uisoengachim.

Puritanrang nokoniko am'rikitako dondike dal'gipa kuturio tom'aha, aro unona me'chikrangko okamchimongaha. Ua bi'sa an'tangni ma'gipako

sing'ako aro uni aganchakarango knatimaha. Uni pagipako jokatna ine ma'gipani tol'e aganakoba ua knaaha. Unon Puritanrangoni saksa an'tangni sepango donggipa sakgipin baksa agangrikaha, aro sakgipin chakate pamongna aganaha. Unon ua pamong ua bi'sachiko mikgitchingchi nie aganaha, 'Beben indakon nambebeben, an'ching ua bi'sako rang'san sing'e nina.'

Ma'gipako jitange chadengchina ge'etemung, bi'sako mejni sambaoa okamataha. Ua bichal ka'gipani sambao sronge kenmangija pagipani bimangini jagring gita chacha chadengaha. Ua kimkim tom'tom dake mesokaha, indiba uni ka'tongde kenani giminan ka'tong rongchu su'-pilengachim. Pagipani dongnuani biapko mesoke on'gija dakna, aro pilsara tol'e agangija daknaba ua bi'sa chongipana namen neng'beani ong'achim. Puritanrangoni saksa uchina bomgope ka'sne aganaha, 'To'leagangiparangko Gitel Isol uni jring-jrotni bon'changgiagipa wa'alchi kamatchina, aro Gitel Isolui ka'onangao ga'akgiparangko ua sasti on'china. Da'o angni aganako knatimbo, anga nang'ko Gitel Isolui bimungko minge iako sing'enga, Nang'pako nang'mi mikhotara basako?'

Anga Colonel Sidneyko da'siwalo nikaha, ine bi'sa kimkim ong'e aganchakaha. 'Da'siwalone?' ine uamang sing'aha. Isolui kenchina rajako mande ra'china aro angni an'tangni songna ka'-sachina ua angna aganaha, ine ua bi'sa agananguaha. Bichal ka'giparangoni saksa aganaha, 'Da'siwalone, indide uara ia nokon ong'enggenmo?' 'Oe, ia nokon,' ine bi'sa aganchakaha.

'Nokni badia bako chacha?' ine bichal ka'gipa sing'aha. 'Anga na'simangna mesokgen,' ine ua

bi'sa aganchakaha. Uamang sengnapgija dake chakattokaha, aro ua bi'sa uamangko chonbegipa palangko donram kuturi ge'saona rimangaha.

'Ianosai,' ine ua palangko mesoke aganaha. 'Iara sani kuturi?' 'Ian angni kuturi.' 'Nang'ni pagipa nang'ona ianona da'siwalo re'barane?' 'Oe ianonan re'bara.' 'Unikoa ua bachina re'angaha?' 'Anga uija, maina, uni re'bamitingode anga tusiengachim, aro uni re'angpiloba angade tusiengpiti.' 'Nang'ni indake aganani mangsongara mai?' 'Angni pagipako angni nikchotade jumangchisa inesai,' ine bi'sa aganchakaha.

Lesson 9: Androcles aro Singho

Androcles changsao Africani salgro rikamchina rim'angakoman'gipasaksa Roman nokolong'achim. Uni nokgipa ka'saniggijagipa ong'ani gimin ua pangnan dukko man'rongachim. Uni gimin ua songtangchina katpilna ine wal sao nokgipani nokoni ong'kate sagal rikamchina miksonge re'aha, indiba rama brangemung a'gisichinasa sokangskaha. Unon pring seng'ahaoa ua okkria aro neng'ani gimin rama re'angkuna amjae damsagrimni rong'kolo nape tusiaha. Unon adita tusiani ja'mano maiba gam'bea randingachi mikakatako man'aha. Androcles mikrake nion grimni ku'mango mangsa dal'begipa singhoko nikenamenkenbeaha, aro uasinghouko chike cha'chongrotgen ine chanchie uni chagopakosan nichakoaiaha. Singho an'tangni saknaenggipa jakpako ha'srake, mandeni dakchakako bi'enga gita chachanandechiko nie duk ong'a gnang ma'amaha.




Androcles an'tangni kenako galenba singhochina re'ange nioa, singho an'tangni saknaenggipa jakpako de'doe on'aha. Unon uni jakpako nioa uno bu'su dal'bea bu'engako nike uko oke galataha. Singho an'tangko saknaeoniko jokatahani gimin kusi ong'e bakkaban re'angemung sapau mangsako chike ra'bae mandena on'eaha. Aro mande ua sapauko cha'manoa singho uko rimange grikgbegipa chimik damsako una mesokeaha. Indaken uamang ripeng ong'e ruutbea salna kingking ua grimon damsan dongaha.

Ruutbea salni ja'mano mande singho baksa damsan dongako neng'nike, mandeska baksa dongna skani gimin uoni katangaha. Indiba rim'ako man'e Romchina watatako man'aha. Unon bichal ka'gipa uko bichal ka'emung so'ote galna hukum on'aha; maina uochachade Romrang nokol katgiparangko rim'na man'ode uamangko so'ote galrongachim. Unon tamasa ong'ani sal sokahaoa Africaoniko rim'badaldalgipa mangsa dal'begipa singhona Androclesko on'na tik ka'aha. Ua singhoko sal bri sal bonga intal mamungba cha-aniko on'gija okkriate donsoengachim. Tamasa ong'ramona pilak manderang nina ine tom'batokahaoa, aro rajaba uko nina re'baahaoa, Androclesko singhona on'na ine rimbaha, aro jinmani niram biapni jatchio tarigimin biapo uko chadengate singhoko oe watataha. Androcles singhoko niksoon namen kenbeaha; indiba singho uko chagrope chikani pal uni sepangona re'bae mikmalbegipa achakni nokgipao gon'gona gita gon'goneaha. Iako nikon pilak manderangan aiao inmanpiltokaha.

Unon raja Androclesko okamate singho uko indake dakani ja'pangko sing'aha. Androcles an'tangni pilak, katarangko agantokahaoa raja uko namnikemung Androcles aro singhokoba jakgitel wataha. Unon uamang damsan ruuta salna kingking Romeo dongaha ine agana.

Lesson 10: Meserangni Melaa



1. Salantian menggo mangsa meserangko chike,
Bon'angatengachim ina pilakkon indake,
Uni gimin meseranga namen jajrengaha,
Menggooni jokna cholko tom'e melaaha.
2. Matsramgipa wagam ine bimung mingsing-
gipa,
Ong'paaha ina uan mela'ko dilgipa,
Mangsa aganaha, 'An'ching a'kol tu'e kitna,
Menggo re'baengodeni nape kattokaina.'
3. Mangsa aganaha, 'An'ching chel'achin kat-
srangna,
Unon ia menggooni man'gen joksrangtokna.'
Mangsa aganaha, 'Ripeng, indakede namja,
Atchiramko wate anga gipinchide katja.'

4. Pante rokrek mese balek-mangsa aganaha,
An'tangni chanchia gita uaba inaha,
'Menggo mancha angchi chacha re'babebeode,
Ga'tingdate nachil sale watatgen angade.'
5. Manggipin aganjok, 'Anga ki'meo salrikgen,
Su'kropemung gitilchina wattimbangataigen.'
Manggipin aganjok, 'Bia re'bapa angchisa,
Timing timang watataigen apsa satkapesa.'
6. Meserangni giseponi gisik seng'kalgipa,
Alamala chanchidilna bate changkalgipa,
Aganaha, 'An'ching una gantiko kadena,
Kinasona man'e an'ching unon man'gen
katna.'
7. Oejaode nama ine pilakan inaha,
Ia chanchianan uko miteltokbeaha.
Indioba mese mangsa budepabatgipa,
Pilakchikon mikkang ki'sang chanchidil-
kalgipa.
8. 'Nambeaha, na'simangni chanchiako jeja,
Ganti kadenakgipako m'ninasa mingsoja?'
Chakatemung indi ine ua aganaha,
Aganchakna man'tokjae jripjrip dongaiaha.
9. Unochacha ua menggo ning'china napbajok,
Mese jinma koltangtangchi napbildangang-
tokjok.
Matsramgipa wagambani dongsona pa'jaha,
Pante rokrek mese balek' nion nikrikjaha.

M. G. MOMIN

Lesson 11: Joan of Arc

Englishrang baksa Francerangni dakgrikmitingo Franceni song damsao Joan of Arc minggipa me'tra saksa gngangchim. Uan an'tangni atchiram songo tom'tom dongmitingo, 'Chakate France a'-songko jokatbo' ine Isolni ku'rang mikjumangchi una sokbaha. Ua nikani, una indin ong'gramaiani ong'jaha, indiba Isolni ku'rangaro ge'eta chong'mot ine ua bate bate chanchina a'bachengaha. Indaken an'tangni sepango donggiparangkoba bebe ra'atna joton ka'aha. Ua rajani dongramonaba re'bae an'tangni nikanini gimin aganaha. Skangde manderang uko ma'mantichi chonnikaha, aro ka'dingstekaha. Indiba ja'mano uni mangsonga nama aro cholon rongtalako nike, France a'-songko jokatna Isol uko ong'katataha ine uamangba bebera'aha. Rajaba Orleans songko dakgrikenggipa Englishrang baksa dakgrikchina, gureo gakatgipa sipai dol sani skotong dake uko watataha. Uni rongtalgipa cholonrangni gimin uko ja'rikgipa sipairang kratcha'pilachim, aro uko salgioni watatgipa uamangni dilgipa ine uien un baksa ja'rikangaha. Ua jechi dilanga uchin bobilrangko amna man'gen gita uamang chanchiman'pilaha. Indaken Orleans songko warachake Englishrangni chipchangaoniko jokataha. Indiba ja'mano Englishrang uko nampinike chol dakachi rim'e, skal ba montol dakna man'gipa me'chik ine pote bichal ka'emung gittang so'e so'otna ge'etaha. Indaken uko bol songemung uno chadengate kachape am'bol dandule gittang so'e galaha. Ua a'songtangna janggitangko on'chakani gimin pilak manderang uko

mingsingaha aro Englishrangba ja'mano uko rongtalgipa ka'donggipa me'tra ine ku'rachakpaaha.

Lesson 12: Sipai Kotokko Katpilatgipa Bi'sa

Italyni salgro salaram gisepo donggipa Tyrole manderang baksa Frenchrangni dakgrikmitingo. Franceni sipairang Ard minggipa chibimani rikamo donggipa song damsako ra'sekna ine re'angahachim. Samtangtangchi dram chubegipa aro ta'arakbee jokgipa chiko batangesa ua songko ra'sekna man'genchim. Indiba ua chikare tu'gipako dram samsaoni samsaona sokpile be'dambenggipa dal'begipa bol dotsa gnangchim, uko manderang jal'ang dake male re'na ine den'pedapaha.

Ritcha gittam Tyrole manderang, aro uamang baksa Albert Speckbacher minggipa bi'sa saksa ua jal'angko nitimengachim. Frenchrangni re'baengako nikon Tyrole manderang ua jal'angko ruachi den'sotna a'bachengaha. Indiba matchotgijan Frenchrang goani gimin jal'angko den'sotgipa manderang saksani ja'mano saksa guli nange gitilrikrikangaha. Ua sianggiparangni gisepo saksa Albertni pagipa ong'achim. Jal'ang be'na sepangbaengahachim, aro da'o bilsa bilgni den'atkuna man'ode jal'ang be'srange Francerangna re'baani chol dongjawahachim. Albert an'tangni pagipani biapko ra'aha, aro ruako ra'e an'tangni janggini gimin mamungba kenchakgijan jal'angko den'sotna a'bachengaha. Chotsrangna on'titisan dongaiaha-chim, indiba unon Albert an'tangni song aro jatangni gimin an'tangni janggiko on'chakaha. Ua ruako galbrakemung ua jal'angni kosako bilonge

bildapaha unon jal'angmung mandemung tu-
 begipa ka'machi ta'rakbegipa chiona ga'akonangaha.
 Franceni sipairang ua bi'sani inditan ka'dongako
 nike aiao inmanpilaha, aro uni manggisiko kolame,
 uko mandera'e gopemung uni siako gisik ra'atna
 gita, uni goprano see donaha.

Lesson 13: British West Indiani Chichangrang

Britishrangni man'gimin chichangrangni gisepo
 damgittamkosan mongsong janapna krabata,
 chong'motan Jamaica, Barbados aro Trinidad.
 Jamaicani Blue Mountains minggipa a'brirang mik
 470 mangna kingking chua. Uno chibimarang
 bang'a. Mitam chibimarangni chirang rong'brak
 a'solsol dakgiparangkong sagalona ga'akonbaaria.
 Uaranga bakroja, aro jahatrangko chona man'ja. Ia
 chichangrango donggipa salgroni bakranga mitamde
 nitobea. Burung aro bolgrimarigipa adita ona
 chua dakgipa a'brirang, aro nitogipa sal
 nangchakgipa a'kawerang donga. Ka'singipa
 balwako man'gipa a'brirangna agrede pilakan
 an'senggipa ong'ja. Sagal rikamjolni ongipa a-
 a-ango rokomsa holdiasob saronga. Ua chi-
 changni dal'batgipa skotonggipa songjinma King-
 ston ong'a, aro uan badingani mongsonggipa
 biapba ong'a. Uani bondorni ku'mango skango
 nitobegipa aro 1700 bilsini bon'achibara
 banggriachi gimaatako man'gipa Port Royal
 minggipa songjinmani surigiminrang donga.
 Jamaicani ma'manti dingtang dingtang itihazrang
 gnang. Uko 1494 bilsio Columbus nikchengaha, aro
 uni ruutgija bilsirangni ja'mano Spainrang uko

ra'chengaha. Indiba uni ja'mano Englishrang uko ra'sekaha. Untal Negrorang changgni bobil dake chakate Governmentna adita dukko on'aha.

Barbadosara gimik chichangrangni gisepo mande bang'batgipa, aro a'a gamna nambatgipa ong'a. Uni pilakchin ong'nasipile coralrang gnang. Uni dal'ara 160 square mail ong'a, aro ua chongipa a'aon mande 18,000 ongnasipile donga. Iano donggipa Negrorang an'tangtangni bimchipachi gipin chichangrango donggipa mande gisimrangna nambegipa dake mesokaniko donaha.

Trinidadara Lesser Antillerangni gisepo dal'batgipa chichang ong'a. Ua uni salgipeng saliram bon'chotachi donggipa *pitch*, chong'motan a'ani cha'chatni giminsan mongsongde mingsingako man'a. Sorokrangko gatna, aro rong'plengrangko andapna uamang bilsianti hajalni hajal muan *pitch* rangko gipin a'songrangchina on'ata.

Bahamaranga West Indiani chichangrangni gisepo salgrobatgipa ong'a, aro uaranga bang'bea chonchongipa chichangrang aro rong'brakrang ong'aia. Uarango mande bang'gijasan dongaria. Gipin West Indiani chichangrangna bate uan songdongna nambata. Chibimarang aro chichangrang dongjasrangani gimin chiko chiakolonikosan man'na amaia. Sagal rikamrango ki'singko bang'en man'na ama. Cuba 1898 bilsio dakgrika intal United Statesni ong'aha. Unoni manderangko adita dile skimano, United States uamangko jakgitel wataha. Uan dal'batgipa chichang ong'a, aro a'gilsakni gisepo nitobatgipa a'a ong'a. Gulf-of-Mexicoona napani cholramao dongani giminba ua namen nangbegipaba onga. Havana, Santiago aro ugita gipin namgipa bondarrang adita dongani

gimin, aro a'kawerango ta'maku aro gritko ge'na nambeani gimín, aro a'bhirango gamchatgipa a'ningo donggipa bosturang, mongsongde tama dengani gimín badingani mongsonggipa biap ong'a Havana Cubani skotong songjinma, uan cigarni gimín mingsinggipa biap ong'a.

Bermuda chichangranga West Indiani chichangrangni bak ge'sa chong'motde ong'ja. Uarang North Americani sepangbatgipa a'aoni mail 600 chel'a. 1522 bilsio Spainni kalasi saksa Bermuda minggipa ua chichangrangko nikchengani gimín uarangko Bermuda minggopaha. Uaranga coral jo'ongrangni rikgimin chibima grigipa rong'brak dakgipa chichangrang ong'a, aro salaramchina agrede pilakchin coralrang gnang. Uano pangnan ding'karini a'bachengaengmiting gita ong'a. Unigimin ua jolrangni sepangjolo donggipa chichangrangni bilgrigipa manderang uko namnikbea. Sin'a aro suuride dongan dongjasrang. Aro ding'karini ding'akoa sagaloni balbagipa ka'singipa namgipa balwachi ka'sinata. Uno dinggipa Europeoni manderang aro Negrorang gimik gimang 15,000 mang ong'a. Uamang pilakan mongsongde bol biterang aro me'su samjakrangkosan ge'aria.

Lesson 14: Dakgrikani Jahatrang

Scotland asongo Mary minggipa rani gnangchim. Uni siani ja'mano ruutgijan, uni ripeng Spainni raja Phillip England a'songni rani Elizabethko England a'songoniko a'rikatna ine Spainrangan gapgipa bang-bea jahatrangko watatna mangsongaha. Ua England a'songko an'tangni songnokni tong'sa dakna mangsongaha. Ua namen namgijagipa raja onga'chim. An'tangni mande-rangan una bamgija dake uko dakgrikaha. Aro bang'a English sipairangan uko dakgrikgiparangna dakchakna re'angaha. Uni gimin Phillip iako namen namnikjabeaha. Una agreba ua sagal nalsachi donggipa dalgipa America a'songko an'tangna man'gopna skachim. Spainrang gita chacha Englishrangde Americachi re'angpana man'gijani a'selko Englishrang nikjachim. Aro Englishrang pangnan Spainni kalasirang baksa dakgrikronga-chim, aro uamangni jahatrangoniko sona ruparango ra'sekrongachim. Iani giminba Phillip namen ka'onangbeaha. Ua Englishrangko aro uamangni raniko sasti on'na mangsongaha. Phillipni namgipa dal'gipa jahatrangko namedake tarimano uarango chochakatna a'bachengaha. Dram chugiparangoni nikwatsona man'piljana gita, uamang Englandni sepangona choangaha. Spainrangni re'baako uiatna uororo dak dongjani gimin uamang an'tangtangni dongram chugipa a'brio am'bolko dane so'aha. Unon uni chel'ao donggiparang ua wa'alko nikatoa uamangba an'tangtangni dongram a'brini kosako wa'alko so'skaaha. Uandake England a'song gimikni chugipa a-

brirango wa'al so'e Spainni jahatrangni re'baako a'song gimikchinan uiataha. Spainni dal'gipa jahatrang English Channel joljol chobaha. English-rangni jahatrang Spainrangni jahatrang gita dal'-dalja aro bang'jachim, indiba uamang Spainrangni jahatrangko warachakna re'ange Spainrangni jahatrangko bang'en gimaate pil'baaha.

Englandchina chobatatako man'na bang'bea sipai kotokrangni sengsoenggipa biapona Phillipni jahatrang choangengachim. Uamangko chobatinasiani walsagipao English kalasirangni gisikomingsa nambegipa chanchiani naaha. Uamang mitam jahatrago ma'manti kamninggipa bosturangko brae wa'al so'emung Spainrangni jahatrangni jatchiona balpakataha. Spainrang uarangko niksoe namen kenbeaha, aro ua wa'aloni jokna ine jechiba chobingbange kataha. Unon kamgipa jahatrang Spainrangni jahatrangni jatchiona sokani bak ja'manoni ta'rakbegipa balwalbae jahatrangko rong'brakrangko salgate galaha. Indaken Englandona re'bana sengsogipa Spainni sipairang mamung saloba Englandchina sokbajaha.

Lesson 15: Newfoundland

Newfoundland chichanga British Colonyrangni gisepo gitchambatgipa ong'a. Ua Irelandna bate dal'bata. Ua Saint Lawrence chibimako, aro Canadachina re'ruraani ramako, Atlantic sagalni ta'rakgipa balwako, aro North Polechi donggipa sagaloni jokbagipa suuri tin'kagiparangko champenge rakigipa gita ong'a. Salgro aro saliramchi apchonbata, mail chikungsanapalaia. Liverpooloni

Quebecona re'ani kan'dikbatgipa ramani tong'sa Belle Isle minggipa chiapgitok ong'a. Uan Newfoundlandko Labradoroniko dingtangata. Dramrang namen ga'nangja, aro ong'na krajapile sagal napsikgiparang ghang. Uni gimin uko Peninsulani chichang ine mingnan nampila. Salgipeng salaramchi donggipa Avalon Peninsula haida krabatgijagipa ong'a, maina uni bimanga Starfish minggipa sagalni na'tok ma'sani bimang gita dakanga. Newfoundland ga'nanggijagipa, rong-brak dakgipa aro chugipa a'briranga, mongsongde Atlanticchipak ong'bata. Uno bondorarang, sagal noksikrang aro napsikgipa sagalrang bang'bea. Ning'tuachi donggipa a'ara mongsongde a'sal grigipa ong'a, aro a'brirang, ga'nanggijagipa chugipa a'kawerang, chibolrang aro chonchongipa samsi chagipa a'arang ong'a. Pine aro birch, iarangan mongsonggipa bolrang ong'a. Salmon na'tokrang ba'gipa aro chongipa chibimarango donga. Ua chibimarango chonchongipa ringrangna agre gipinrangkode chona man'ja. Sagalni sepango dongani gimin uni balwa Canadanina bate chijimbata. Sin'kario agre sin'ja, aro ding'kari bakrojaoba Englandni ding'kari gita dakanga. Songo donggiparang mingsa namen dongtogijaniko chakchikna nanga, chong'motan Gulfstreamni ding'gipa chi aro Arctic chini jokbagipa ka'singipa chi nangdimgrike bang'a salon ritchabegipa guurirangko ong'katatranga. Newfoundlandni salgipeng aro salaramchi adita chel'ao British chichangrang gita apsan dal'gipa aro chugipa a'kawe sagalni ning'o donga. Uan Grand Banks ingipako man'gopa. Uan sagalni bang'bea janggi gnanggi-parangni dongram ong'a. Unonikon ding'kario

aro sin'kari a'bachengmitingo pilak songna bate bang'bata cod' minggipa na'tokrangko rim'a. Newfoundlandonisan ong'gija Canada. France aro United Statesoniba hajalni hajal jahatrang cod na'tokrangko rim'na re'baronga. Uarangko kari nonge ran'atmano a'gilsakni pilak songrangchina palna on'ata. Ia na'tokrangko rim'anian mong-songgipa ong'ani gimin, aro rikamjoloba cod, herring aro salmon na'tokrangko rim'na man'ani gimin, uno songdonggiparangni gisepo bang'batan na'tok rim'e cha'giparang ong'a. Cod na'tokni bikaoniko Cod-Liver-Oil ine minggipa samko bikota. Uchin hajalni hajal manderang saaoni an'sengatako man'aha. Seal minggipa na'tokko rim'aniba mingsa namgipa chol ong'a.

Bilsianti ding'kari a'bachengbamitingo dal'dalhe-gipa suurini rangkaprangko Arcticoni ta'rake jokbagipa chirang man'pakbaa, ua balbogipa chichangrangni kosako seal na'tokrangko man'-chapbaa. Uarang uanon bi'sa pe'a. Uaranga Poleni sepango dongkamgiparang gita bigil gamchat-giparang ong'ja ong'ade, indiba uarangni mitim aro bigil aditan gamchata. Manderang mongsongde salgipeng aro salgipeng-salaramchi dongbata.

Saint John Newfoundlandni skotong songjinma ong'a. Uan badingani mongsonggipa biap ong'a. Songde chona, indiba ua namgipa bondor ong'a, aro Atlanticchina dakgipa chongipa ramana agre pilakchin a'brini guare gnang. Labradorni rikam-jolrang a'gilsakni gisepo sikdikdik dakbatgipa biap ong'a. Uno Esquimorang aro na'tok rim'e sikar ka'e cha'gipa Europeani manderang bang'gijasan dongaia.

Lesson 16: Alpaca

Alpaca mes gita dakgipa rokomsa matburung ong'a, indiba uni gitok mesni gitokna bate ro'bata aro skoba nitobata. Mesni kimil gita alpacaniba rinokgipa ong'a, aro uan mesni kimilna bate ro'ro-bata. Uko adita bilsirangna kingking rasotgija donode, ua inch 20 ba inch 30 na kingking ro'ronga. Alpacani dongram South Americani Andes a'bri-rangni bidingrango ong'a. Alpacarang chubatgipa a'bhirango dongna namnika. Uarang jakprako 100 ba 200 bate donga. Matburung ong'mitingo ua kenrakgipa aro seng'begipa ong'a. A'brini chubat-gipa biaprango uarang nitimgiparangko dona, unon maiba kenaniko niksoode ua gam'bee mikoe jinmako gisik mikrakatsoronga.

Alpacarang adita gisik gnanggipa matburungrang ong'a; maina uarang mikka balwa ta'raknasiarangko uisoronga, aro indake uisoon chakna namgipa biaprangona kate chakronga. Chili aro Peruo alpacarangko bang'bate nikna man'a. Manderang uarangni jakko jileba a'bhirango nirikronga. Kimil rasotani somoi ong'ahaosa uarangko nokona mobae uarangni kimilrangko rasotronga.

Alpacarang jakgitel ong'e burung a'bhirango an'tangtangni ripengrang baksa dongna namnik-ronga. Chonmitingon uarangko rim'e jilna man'-ode, uarang mande baksa dongna namnika, aro mandena kenja. Manderang alpacani kimilko jakkalbea. Ua su'uta aro resem gita se'ena. Chili aro Peruo donggipa manderang unonikon chola aro pindape tauni ba'rarangko dakronga. Alpacani kimiloniko ba'ra dakchengantal da'o bilsu sotbonga-

mangsan ong'angaiengpiti. Da'ode chata aro gipin bosturangko dakna uko bang'en jakkalenga. Ia a'songni a'brirangoba alpacako jilode namnaba donga. Mitam dal'gipa manderang baritangtango urangko adita jilaba jila. Indiba uarang an'tangtangni ag'songo, chong'motan South Americani chugipa a'brirangon an'sengbata gita nika, maina uarang uno silbata.

Lesson 17: Dikdiksa Kaonangani

Englandni song damsao Jack Wilson aro Henry Jackson minggipa bi'sa sakgni gnangchim. Uamang sakgnian apsan soroko donga, apsan schoolo poraia, damsan rorimronga, kal'grikronga aro ka'sa-grikrongachim. Chutini salrango gipin biapchina damsan re'ange rorongachim.

Sal sao uamang maiba kal'aniko kal'mitingo jegrikaha. Jegrikani a'selde bang'jachim; indiba maibakai uamang sakgnian unsalode saksa sak-gipinna bamgrikna sikjaha. Uamang ka'onange jegrike dokgrikaha. Jack Henryko dokaha, Henryba dokpilaha. Ja'man ki'tiko uamangoni saksa sak-gipinko ga'tingdataha, unon ga'tingdatako man'gipa sorok repianio ga'ake sibokaha. Uko nokchina de'tomangaiaha.

Ua anti bongana kingking jimaha. Uni ma'drangrang aro ripengskarang una duk man'aha. Doctor aganaha, 'Ua mamung saloba namedake an'sengsrangna man'jawa, ma'gipa uko name nirokna nanggen, aro ua an'tangni janggi tanganina bang'e kam ka'na man'jawa.'


Ua bi'sa sakgni bobil ong'grikgbegiparang ong'-genchimoba, iana bate duk ong'gnikode saksa sakgipinna ong'atna man'jawachim. Saksara sinakrip kora ong'aha, sakgipinara an'tangni daka kamni namgijako pangnaba gualna man'jaha.

Uamang ka'saninggijagipa bi'sarang ong'jachim; indiba uamang'ni bewalrang ga'nanggijagipa ong'-rongachim. Uamang an'tangtangko sason ka'na man'kujachim. Ga'nanggijagipa kata aro kamara mande chong'mot ong'ani ong'ja. Janggi tanga gimikon ka'sagipa aro rinok rinok dakgipa ong'na nanga. Pilaknan bebegipa, ka'sagipa aro rinok rinok dakgipa ong'anisa mande chong'mot ong'ani ong'a.

Bi'sani cholon namako uina skode, uni ma'gipa, pagipa, jonggipa aro nogipana daka kamrangko nien uina man'a. Ua uamangna ka'sagipa ong'-ode, ua namgipa mandeba ong'a.

Pilakna bate na'a an'tangko sason ka'chengbo. Sengnapgija aro manigija dakani cholon mandeko namgijaona dilangnaba donga, aro uani gimin an'tangni janggi tanga gimiko ua duk man'na nangnaba donga.

Lesson 18: Pyramidrang



Re'anggin chasongrango gitcam manderang-ni changako aro mingsingako mesokna ine a'gilsako badita aiao inmanpilgipa rikgiminrang gnang; uarangni gisepo pilakna bate Misor a'songo Gizeh songjinmani pyramidrangan aiao inmanbatgipa aro mingsingbatgipa ong'a. Skango Misor a'songo donggipa rajarang an'tangtango mingsingatna ine an'tangtangni gopramrangni kosako ua pyramidrangko rikatahachim. Uaragoni dal'batgipako bilsil6,000 mangna skangon Misorni Pharao Chufu minggipa an'tangni gopramni kosako rikataha. Uan a'gilsako rikanirangni gisepo dal'batgipa ong'a, aro ua skangode mik 320 chuachim. Uni dal'a 1,45,000 square mikna bata. Uko lak sa manderang bilsil kolatchina kingking rikaha ine agana. Gopram nokdring aro unona re'ani ramana agre gimikan ro'ong dotgimik gita dakaia. Uako gatani ro'ong dotprakan dal'dalbea. Dilgipa griode a'gital manderang uko gakate nina amja. Ua ro'ongrango

Assouan minggipa chel'begipa biaponikosa cho'e bikotaha, aro chel'beoniko uarangko chibimajoljol choonbae ra'baaha. Uniko hajalni hajal mande-rang uarangko a'gisi an'chengrangni kosako rom-tombaaha. Uko rikmitingo uarangko saldoe indita chuao gatanirangko chanchie niode namen aiao inmanpilani ong'a. Ia pilak aiao inmanpilani, aro indita bang'e koros ka'e rikgiminranga rajarang an'tangtangko mingsingatna aro an'tangtangni manggisirangko jringjrotna gimagija donangnasan ong'achim; maina Misor manderang mande manggisirangko soatgija rong'kolrango aro pyramidrang-ni ning'o donrongachim.

Indita dal'gipa aro chugipa pyramidrangko rikmitingo maikai dal'dalbegipa ro'ongrangko dotsani kosako dotsako gatrikrikangaha, ian namen aiao inmanpilani ong'a. Pyramidko gatmitingon badita chue gatanga inditan unona dal'gipa ro'ong-rangko romtomdona man'na gita adita chela intal a'ako gitchege chue gatdoangachim, aro uni kosako rong'plengrangko andape adita rimilatna uarango toko rudapachim. Indakesa dal'dalgipa ro'ongrangko indita chuaona saldona man'aha. Unikoa gimikkon gatdoman'ahaosa gitchege gat-gipa a'ako rue galskae pyramidrarako donaha.

Lesson 19: Kangalni Chanchianirang

1. Dakgipa Isolan ka'sae pilakkon dakaha,
Pilaknan apsan dakbae alba alduaha;
Iandaken anga bebera'bapaengachim,
Uandaken ong'a ine chanba chanchiachim.

2. Indioba ong'rongade dingsa dingtangake,
Apsan patienga ine angade nikjake;
Maina ia a'gilsako indaken nikronga,
Mitam man'e cha'a, mitam kangalsa ong'anga.
3. Man'gipade man'angenga cha'na amchakgija,
Grigipade kangal ong'a ku'saba man'gija;
Donggipa an'tangni gamo asong chabe'ngoba,
Donggijade pel samangba man'paja unoba.
4. Man'gipani amchakgija ringa cha'arangko,
Ku'chi minok bika rim'rok dakmana gisiko,
An'tang ka'tongtango srik srik gisiko sikkime,
Dongosamung angobani ine chanchiman'e.
5. Donggipade bate bate man'dapdapaienga,
Donggijade salantian onsa onangenga.
Indide Isola bia mikkang nigipama,
Angni dukko nikengoba nikgija dakama !
6. Kangale dongakon Isol angko namnikode,
Sako matnangkuna gose angara indide.
An'tang gnangaon anga chu'ongnikpanaha,
Ku'sa rongsa man'akoba bang'nikpaainaha.
7. Maina Isol angna bang'e gamko on'genoba,
Rasong chapanaba donga unode angaba;
Mande mingpagija dake pilak kangalrangko,
Pangnan dal'niknaba donga angaba an'tangko.
8. Uni gimin Isol angna bilko on'pachina,
An'tang kangalaon pangnan chu'ongnike
dongna;
Sakgipinni man'e cha'o miknengna changgija,
Isolko mitelna man'chong unaba batesa.

Lesson 20: Matchako Sikar Ka'ani

Burungo donggipa darang matburungrangna bate matchaan kenbatgni, aro mandeni bobil ong'batbeani ong'a. Bang'a manderangan pilak gipin matburungrangna bate matchana kenbata.



Manderang ma'manti cholrangchi matchako nisi-ronga. Mitam manderang wa'chol chake uko so'ota, mitam bisichi so'ota, aro mitama slairangchi goe so'ota. Basakoba basakoba manderang matchu ba do'bokrangko burungo kaprue donemung uni sepango donggipa bolo time uko goronga. Basakobade uarangni chikgimin matchu ba do'bokko

done a'ao ba bolo time goronga. Sahebrang aro dal'gipa manderang basakobade mongmao gakate matchako sikar ka'ronga, indiba unoba kenbeani ong'a; maina basakobade matcha mongmani jangilonan bildape an'tangko gogipa mandeko chika.

Mongmaba matchana namen kenbea. Matcha mongmani janggilo bildapode ua mikoprete kata. Mitam matcharang goa nangon rang'san katjoljol-anga, indiba mitamde goani wal'kuko ja'rike rang'san gogipa mandekon chikna chabara. Uni gimin matchako gogipa manderang namen gisik seng'rongbea, aro gomanahaon goramo donggija rang'san gonggee katemung nichaka. Unon matcha chabaode uko gotaina man'a.

Lesson 21: Mongmako Rim'ani

Burungo donggipa pilak matburungrangna bate mongma dal'bata aro bilakbata. Mongmana pilakan kena, indiba uko jile mikmalatode, uan pilak matburungrangna bate kamna cholibatgipa ong'a. An'chingni songo mongma bang'bea. Gisep gisep mongma rim'gipa manderang re'bae ua mongmarangko rim'ronga. Mongmako rim'na sikkipa mande Sorkarina bang'a tangkako on'e pata ra'chengna nanga, aro uni ja'manoba mongmako rim'mitingo basikmang mongmako rim'na man'a ua mangpraknan tangka 100 ko kajana on'kuna nanga. Basakobade mongmarangko mongmaskachi rike rim'aia. Basakobade nol kaesa rim'a. Nol kae rim'ode bang'a manderangko nanga. Mongmarangni robotgipa aro uarangni cha'amenggipa biapko niemung, uarangni cha'amram a'bri gimikkon



o'dula, aro uarang gipinchi jokangna man'jana gita
 nol kamanjana kingking manderang ua biapko
 dongdula. Uniko a mongmarang bachipak chak-
 rongbata aro bachina katsusu nika uko niemung

nolko kaa. Nolko kaon adita dal·dal·gipa bolrangko den·e songa, aro nolni guareko mongsongde a·pal·chinisa sing·chaksoa; maina mongmarangde ning·china salpakna uija, indiba a·pal·chinasi sikipakaia. Nolko namedake kamanahaode, uni ning·ko aro guareko bolgrim gita nikatpile ma·manti bol cheksirangchi pindape aro chel·aonin rama apale dakbae ka·sne ka·sne apchonrorroatbae nolni cholguga baksa apsan apale bon·chotata. Ua ramakoba samtangtangchi guare kae bolgrim dake dakata aro gisep gisep wa'al so·ani biaprangko tarie dona. Unon pilakkon tarimanahaoa mongmarangko pilakchinin duule rikbana a·bachenga. Rama dakgipa jol gimikon mandeko donani gimin mongmarang ua manderangni dongramko badeangahaode wa'alko so·rika. Ki·sang ki·sang rikgipa manderang matchotgijan wa·kapkap doke slai go-ponge rikbara. Unon mongmarang ichiba uchiba katna man·gija kene ramajoljol katbaemung nolo napeahaode, nolni do·ga dal·gipako kagipa buduko den·sotata. Indake nappipa mongma gimikkon chipchanga. Unon nokni mongmarangko moange uarangko mangprakprak kana a·bachenga. Chongipa mongmarangko nolo napani ruutgijan kana man·a. Indiba dal·gipa mongmarangko kanan kenani gimin uarangko salsa salgni chiptate okkriatemung adita nom·atchengesa kaa.

Agre dal·gipa wagam gnanggiparangkode mongmaskarangko jote galna kenemung goe gala. Mongmarangko kamantokahaode uarangko apalona bikottoke kae dona. Uarangna cha·anirangko on·e ka·sne ka·sne mikmalatna joton ka·a. Mikmalkuja dipet uarangko ja'o aro jako kaemung bolrango kae dona.

Chikanna moangode mongma gitchamrang baksa kachape uarangko moangga. Adita mikmalahaode uarangko skina a'bachenga, aro indake skimitingo manderang jinma jinma gitko ring'e skia. Skia man'mano mongmarangko bakan palata, maina mongma skiram biaponan mongmako bregipa manderang tangkarangko ra'e re'baronga. Namgipa dal'gipa mongmarangko tangka 4,000, ba 5,000 dake brea. Mongmachi manderang bang'a kamrangko ka'atna, aro malrangko gate ra'angna man'a, indiba mongsongde uko gakate re'na jakkalbata.

Lesson 22: Alexander-the-Great

Macedoniani raja Philipni degipa Alexander-the-Great minggipa an'tangni siani salo bilsil kolatchi gittamsan ong'aioba bang'a dinggrik dakgrikarango an'tangko mingsingatbeaha. Ua dakgrikna changaniko pagipa Philiponikoskia man'ahachim. Philip Macedoniako Greek a'songrangni gisepo mongsongbatgipa dake donani salo, Persiani rajani songnok Indiani arioni Mediterranean sagalona soka. Aro Misor a'songba uni ning'o ong'a ine uioba ua dal'gipa songnokko dakgrikna ine Philip raja an'tangni sipai kotokrangko watatna mangsongsoaha. Indiba Persiani rajani bang'begipa sipai kotokrangko dakgrikna ua an'tangni bang'gija sipairangkosan watatna man'ayahachim.

Unomiting Alexander bilsil kolgrik gittamni pantesan ong'aiengoba, ua an'tangni sipai kotokrangko Persiani raja Dariusni songnokni Asia Minorona dilangaha. Aro Granicus chibimao dakgriko ua Persiani sipai kotokrangko amsrangaha.

Unon Darius gipin dal'begipa kotokko rimbite Issuso uko gronggrikaha, aro unoba ua uamangko amtaiaha. Uni ja'mano Alexander saliramni a'song-rangko amchengna mangsongaha. Ua Palestineni



salgrochi donggipa Phoeniciani songjinmarangko bnekataha. Unon Misor songba una bamaha. Unon ua Dariusna chataiemung Arbelaao uko bamatsrangaha, aro ja'mano ruutgijan Dariusko so'otataha.

Alexander Persia gimikko amahaoba, uko chu'-ongnikjae, Indiaona napbaaha. Indiani saksa ka'dongbegipa raja Porus minggipakoba ua amaha. Indake una skang pilak rajaba indita dal'gipa song-nokni raja ong'kujachim. Ia pilakkon Alexander

bilsi chikungni gisepon dakaha. Indiba ua una bate indake dakangkuna cholko man'jaha; maina un-ja'mano ruutgijan ua sae siaha. Uni dalgipa songnokko uni generalrangsa sualgrike ra'rikaha.

Lesson 23: Greenland

Greenland a'song Americani salgro bon'chotachi ong'a. Ua a'songo pangnan bilsi jolgimiknan suuri ona. Uni salgrochipak suurina agre uno pangnaba a'ako nikna man'rongbreja. Bilsi jolgimikan a'ako suurichi pindapani gimin mamungkoba ge'na gamna man'ja. Sam bolrangba chaa dongja. July jaosan on'tisa ding'kari ong'aria, aro unosan bol ku'simang gita dakgipa samsirang a'ani kosako chaaria, aro salgipengchipako on'titiko ge'na man'a. Suurio donggipa 'Raindeer' minggipa matchokrang uarangke cha'e tanga. Ua a'songo donggipa mandrang bang'ja. Uamangko Esquimorang minga. Uamanga chakandika. Uamang matbigilrangkosa gana. Uamang suurikon ro'ong gita dotgimik gimik ra'emung gate nok rike donga. Nokko chonchone aro gongdole rika. Nok jatchiosan jenten mande chadengna chua chu'ongaia. Cholgugao suuri dongpengjana gita uamang cholgugako ondike gop dake dakange adita chel'aosa do'gacholko naatea. Uni gimin Esquimorangni nokchi napangode adita chel'aoni tugope malesa napangna nanga. Uamangni nokrango wa'al sikna man'ja, aro uano wa'al sikna am'bolba dongja. Am'bol dongemung wa'al sikoba nokan jronggenchim. Uni gimin uamang alamala teng'atna mangmang na'tokni ba maiba gipin mitumni chakiko delmrumru dake so'aia. Uamang

na'tok aro suurio donggipa gipin matburunrangko sikar ka'e cha'a. Timi, seal aro gipinrangko suurini kosako ong'kate salbaramarangko time su'a. Suurio donggipa mapil gipok aro gipin kimil bang'gipa matburunrangkoba su'e man'ronga. Uarangni be'enrangko gittangan cha'a. Uamang sin'a biapo donggiparang ong'ani gimin mitimko bang'en cha'na mana. Timiko man'ode uamang kusi ong'bee an'tangtangskako okme ale cha'ronga. Uamang chi tin'kagimin suuriko nokrike dongpiloba, chi ringna skode chiko man'na neng'a. Suuriko chakio ka'sne ding'atemung jrongatesa chi ringna man'a.

Greenland a'songo jadok wala aro jadok seng'a. Indiba jadok walmitingo chipchap andalsranggija Salgroni teng'a ine minggipa rokomsa teng'asalgi gimikon jrangjrang dake seng'atskara. Indiba salkode ua jadokna kingking on'tisaba nikja. Jadok seng'mitingoba sal rakbeade ong'ja, indiba da'o an'chingni sal napangnasimitingo salko nikrika gita donggipa chel'bea biapo dongaria a'gilsakko duule pilakchin wilwile roaienga gita nikaia. Ua jadokna kingkingde changsaba salni napakon nikskaja, wilwile chakaienga gita nikaia. A'gilsak tom'beta, aro uamangara a'a tom'betgipani salgro bon'chota-chi dongani gimin, aro uchi salni a'gilsako nangchakram biaponi chel'ahaenba sal nangsokjani gimin uandake ong'a. Dikdiksa ding'karimitingo adita na'tok rim'gipa manderangna agrede, gipin manderang Greenland a'songchi re'angrongbreja.

Lesson 24: Muktako Am'ani

Mukta sonana bate gamchatbatgipa rokomsa bostu ong'a. Uko man'na neng'ani ong'a. Uan mongsongde sagalni rikamo donggipa rokomsa gapchilekni ning'o dongronga. Indiba basakoba



basakoba uko na'tok dal'giparangni okningonikoba man'na ama. Uan rokom sa ro'ong gita raka; indiba uko ro'ong ine aganna man'srangja, maina ua ro'ong gita rakoba ro'ong ong'ja. Gapchilek ba ro'ong, jeni ning'o uko man'a, uni ong'katchakram ma'dotoni uni be'enni maiba bitchioni ka'sne ka'sne tin'kagiminsa ong'a. Ua kimkarongna bate dal'batrongja. Ua grika aro nitoa, aro uko man'na neng'ani gimin uni dām raka. Manderang uko gamchatgipa bostu dake jakkalna aro ma'manti ganding chinding dake tarina namnika. Manderang uko man'na sagalni ning'chi napange bang'bea gapchilekrangko kole ra'bara, aro ja'mano uarangko oe nitokemung basakoba basakoba mitam gapchilekrangoniko rongsa, ronggni ba ronggittam dake man'ronga. Indiba pilakonde dongja, donggipaosa dongaia. Mitamkode indinsa kole ra'bamangmangaia. Muktako badinggiparang uarangko niarin uarangni dingtang dingtang gamchatarangko uironga.

Gapchilekrangni bikrokchiba namnambegipa kudam aro churini bikoprangko dakronga, aro gipin nitogipa bosturangkoa daka. Gapchilekko so'ode ua chun nanga, aro manderang uko cha'a. Ia songni rajarang skangode muktaoniko tarigimin chunko cha'achim.

Lesson 25: Josephko Palata



Joseph Jakobni depante chonbatgipa ong'achim, aro uan uni depante chonbatgipa ong'ani gimin pagipa una namen ka'sabeachim, aro dingtangmancha ka'saani chin gita una chola kingsako ruprup dake sike on'aha. Josephni ja'manchi dal'gniko mesoksoani chinrang gnang. Joseph minggni jumangrangko nikaha. Mingsa uamangni patalo damsan galne kaengmitingo uni adatangrangni galne chakate uni galnena tubamaha. Aro minggipin, sal, ja aro askirang una tubame uko olakiaha. Ia jumangrangni gimin aro pagipa una ka'sabatako nike uni adatangrang uko nina sikjaha aro miknengaha. Uni gimin uamang chol man'an salo una namgijako dakna mangsongaha.

Sal sao Josephni adatangrang an'tangmangni mesrangko Dothano nirikmitingo, uamang maikai dongenga uko niechina, pagipa Josephko uni adatangrangona watataha. Unon uni adatangrang uko nisie galna am'achim, indiba adatang dal'batgipa una ka'sachake uko jokatna skani gimin,

uamang uko nisisranggija chi grigipa chiakol surio galsruaha. Unikoa uamang cha'na asongmitingo, Midianni badinggiparangni utrango gakate re-baengako uamang niksoaha. Unon uamang ku'monge aganaha, 'An'chingni jonggipako nisie galsrangode an'chingna mamung namgni dongja. Unigimin an'chinguko Midianni badinggiparangna palatode adita tangkako man'gen'. Indinemung uamang Midiahni badinggiparangko okamate rupa dot kolatchina uko palataha, aro uni ruprup cholako ra'e mes bi'sako mangsa den'e uni an'chio uko sim'bole, 'Ian nang'ni degipani chola ong'ama ong'ja, Iako name nibo, maina chinga iakosan man-aiaha,' ine uamangni pagipaona ra'bae mesokeaha. Pagipa ua cholako nike uan an'tangni degipani ong'a ine uie namen duk man'beaha. Josephko maiba matburung tong'tang tong'tang dake chike cha'chongmotaha ine ua grabbeaha. Joseph an'tangni ka'sagipa ma'a, paa aro adatangrangoni ekatako man'e chel bea uigija songchi palatako man'ahani gimin gisiko namen duk man'beenggenchim, maina ua uni ma'a paana ka'sabea, aro uni ka'sanninggijagipa adatangrangnaba ka'saachim. An'ching an'chingni ma'a paa aro jonggipa nogiparangna ka'sana nanga.

Joseph Misor a'songona sokangmano, maikai patoko dongaha, aro ja'mano Pharao rajani montri ong'e a'song gimiko dal'gipa mande ong'aha, iani gimin uiangkuna skengode, Abachenga odai 39, 40, 41, 42, iarangko poraie nina man'a.

Lesson 26: Alfred-the-Great

Englandni saksa raja Alfred-the-Great minggipa changsao Dane jatrangko an tangni songnokoniko



a'rikatna joton ka'on uamang baksa dakgrikao amchakjae katemung dongnuna nangaha. Alfred songo donggipa saksa mande ramram gita tarie re'angemung saksa matchu nirikgipani noko dong-

napeaha. Sal sao matchu nirikgipani jikgipa adita pitarangko chankolo gate minchina ine donange uarangko nitimrikchina Alfredko aganemung gipin biapchi dikdiksa re'angaha. Alfred chankol sepango asonge an'tangni chrini buduko tarie an'tangni songnok aro manderangko jokatani ma'-manti cholrangko gisik nange chanchien chanchien pitarangko nitimna nangakode gualsrangaha, aro uarangni kamangengamangkoba uijaha. Unon matchu nirikgipani jikgipa re'bae pitarangni kamangengako nike Alfredko manengbee aganaha, 'Gipinni dake on'giminko cha'nade changa, chankol sepangon asongmangmangariba, chankolo gate donanga pita mangmangkoba nitimsonade changja'.

Aditani ja'mano Alfred matchu nirikgipani nokoni re'angaha, aro Dane manderangko an'tangni songnokoniko a'rikate nitaina mangsonge adita sipairangko chimongaha. Indiba dakgrikna skang uamang badita bang'a, ua uko uichengna skachim. Uni gimin ua an'tangko git ring'rorogipa gita tarie bobilrangni tambu jinmaona re'angaha. Uamangba uko git ring'na on'aha. Unon Alfred uamangni gisepo donge adita ring'joja dake uamangni bang'ako aro dakgrikani adita cholrangko uie re'baha. Unikoa an'tangni sipairang baksa uamangko dakgrike an'tangni songnokoniko uamangko a'rikatna amaha.

Uamangni noko adita sal dongnapegipa mandea uamangni a'songni rajaon ong'achim ine ja'mano uienba matchu nirikgipani jikgipa an'tang manengani gimin namen kenbeaha.

Lesson 27: A'ako Dakani

1. A'chikranga agantoka a'ko dakaniko,
Nostu Nopantu minga a'ko ba'gipako,
Setirini bibal balna chong'kabamitingko,
Samtokani bite nangna situbachengako.
2. Soku sima ja'ping boka Nostu chanchijok,
Uko nike an'tangbani deba'pana sikjok.
Indakemung Nostua a'ko ra'echina,
Ang'keko watatjok ina a'ning chiningchina.
3. Re'angbebe' ang'kebani a'ningchi sokangjok,
Ja'sitangchi a'ko ra'na bikot biksalejok.
Uko nike a'ningoni manderang inaha,
'Ama ambikode na'sa rimangnasiaha'.
4. Indi ine ang'kekoa pongsik ponggoaha,
Indakemung a'ningchian ang'kea siaha.
Uni gimin arimoba ang'keko niksoja.
Jajrengbejok Nostuba ka'a dongtogija.
5. Na'chiko okame injok, 'Re'angtarikubo,
Ang'keko am'ebo aro a'koba ra'babo'.
Nostuni ge'etana uchi a'ningchina,
Na'chi re'angtariaha a'ako ra'bana.
6. A'ningchi sokange nikjok ang'keni siako,
Ang'keni ja'sio nikjok a'a ma'bakako.
Ki'metango remrememung a'ko ra'baaha,
Ra'enba a'gilsakna Na'chi sokbaaha.

7. Sokbaemung Chirimitko mikchae namnike,
Kal'rim rorimaha ina mera pasadape.
Dumaru Changmaru minga Chirimitni seko,
Pongsik ponggoaha ina uaba Na'chiko.
8. Indakemung Na'chibani gitil songchalaijok,
Skotong baksa mikrongrangsa bangki donga-
rijok.
Uko nikmanenba Misi jajrengchakbeaha,
Re'angemung Nostuna uko aganaha.
9. Kinaemung Nostuba Na'rengsiko injok,
Re'angemung Na'rengsisa a'ako ra'ejok.
Indakesa Nostuba a'ko oko kejoj,
Sala jaa chu'sokoa a'ko ba'bebejoj.
10. Direng Sangreng minggipani nagil kaaona.
Na'tokrangko rim'na ine makal dokaona,
Re'angemung tusimchina Misi ku'skiatjok,
Uno tusimesa Na'chi janggi tangarijok.
11. Namedake chanchiemung nipabo iako,
Chanchiode nikchongmotgen namen gualako.
Uni gimin a'ko ba'a inaba tol'asa,
Gokarangna tol'pinike agana gitchusa.
12. Direng Sangreng minggiparang mandeba
dongode,
Nagilba kaode aro makalba dokode,
Indinode skang'talan a'ade dongaha,
A'ningchiko a'ko ra'na watatna nangjaha.
13. Nostuni giminbani manderang agana,
A'ko ba'manao ua buchumajok ina.
Uni gimin Doma Rangsi sinti ninioba,
'Anga buchumajok' ine jechakaha 'naba.

14. Nostude gipinnasa pakwatangarijok.
 Jajrengesa Do'ma Rangsi pil'angpilarijok.
 Nostua mande gita buchuma ong'ode,
 Siba siahakon ua da'ode indide.

—M. RAMKHE

Lesson 28: Englishrangni Americao Songdongeani—I

Skanggipa James rajani sason ka'mitingo Eng-
 lando donggipa manderang an'tangtangni namnika
 gita Isolko olakina man'jachim. Uni gimin mitam
 Puritanrang Hollandchina katangchengaha. Mi-
 tamara a'gilsak gital, chong'motan, America a'song-
 chi katange dongeode, uamangni ska gita Isolko
 olakina man'gen ine chanchiaha, aro skanggipa
 Jamesba uamangko namnikjani gimin Americachi
 katange dongchina uamangna hukuinko on'na
 namnikaha. Americachi katangchenggiparanga
 gimik sak 100 onga'chim. Uamang uchi re'angmano
 maikai ong'gen mamungba uijaoba, an'tangtangni
 ska gita Isolko olakina man'gen ine ka'dongenba
 an'tangtangni nok jam aro songko wate re'angaha.
 Uamangni re'angchenggipa jahatko Mayflower
 mingachim. Uamang Englandni Plymouthoni
 chochakatangani gimin uamangni ong'onchenge-
 gipa Americao donggipa biapkoba New Plymouth
 ine mingaha. Ua re'angchenggipa manderangko
 'Pilgrim Father's ine mingronga. Uamangni re'-
 anganisalko da'alona kingkingba manirongenga, aro
 uamangni re'anggipa jahat aro uamangni ga'dap-

chenggipa ro'ong pilakkon manderang nichina gita Americani New Plymoutho donenga. Americachi re'angchenggiparang cha'a ringani gimin dukko man'rongaha, aro bang'a salon ua songni mande-rangni duk on'akoba man'rongaha. Indiba uamang ka'sne ka'sne namangroroaha. Namgipa silgipa a'barang bang'roroangaha, aro songjinmarangko an'tangtang songrangni bimungrangchi mingaha, chong'motan Windsor, Boston aro ugita gipin-rangba. Songtango jerangan jakgitel ong'e toromko olakina man'jani gimin katbaaha uamang ia gital a'songoba uamangni chanchiarango meligrikjani gimin, aro uamangni a'arangko سوالانیرانگو bang'a jegrikarang ong'katani gimin, uamango aditan tom'tomgijani ongahachim. Englishrangsan mang-mang Americao songdongna joton ka'aiengade ong'ja, indiba Florida aro Gulf-of-Mexiconi rikam-rango Spainrang, aro Saint Lawrence chibimani kosakchi Francerang, aro English mande saksa Henry Hudson minggipani dilbagipa Dutchrangba songdongna joton ka'engachim.

Henry Hudson ja'mano an'tangni bimungchi minggipa sagalo namen duk man'bee siaha. Uan pilak gipin chochenggiparang gita chacha chel'bea salaramchina ramako bikotna joton ka'ahachim. Indaken a'gachina sikdoanggipa chibima dilsani ja'mano dilsako choe nien, ja'mano an'tangni bimungchi minggipa chibimako bikotaha, aro Dutch-rangan songdongani biaprangko dake ua songni manderang baksa matbigil badinganiko dakcheng-aha, aro badingani bondorrangko rikaha. Dutch-rang bimchipani gimin mingsingako man'achim. Uamang noktangtangko songtangni nokrang gita rikaha, aro bilsa sotbongani gisepon uamang hajal

sa manderangni dongram songjinma damsako man'aha, aro ukon uamang New Amsterdam ine mingaha. Englishrang Henry VII ni dongmitingo Virginia aro New Englandni gisepgriko donggipa gimik a'akon Cabot nikchengani gimin ua a'ani kosako uamangan nokgipa ong'a ine kangaha. Cholko man'ahaon uamang New Amsterdamko ra'seke uko New York ine mingskaaha. Gitcam Dutch a'song aro songjinma aro ma'chongrangni bimungrangba da'ona kingking Dutchni bimungrang ong'enga. Ja'mano uamang bang'bata colonyrangko dakangaha. Aro Henrietta Mariani bimungchi minggipa Maryland, aro Charles II ni bimungchi minggipa Carolina, iarango Virginia gita chacha ta'makuko ge'angpaaha. Sir Walter Raleigh skang Virginiaoniko Englandona ta'makurangani bewalko ra'bachenggipa ong'achim. Ja'mano saksa dal'gipa dilgipa William Penn minggipani ning'o Quakerrang songdongna a'bachengaha. William Pennni pagipana gro nangako chotna man'jani gimin Charles II, 1681, bilsio una dal'begipa a'ako on'aha. Ua a'a Delaware minggipa chibimani saliram rikamchi ong'achim, aro uochacha ua jolгимikon bolgrimrara ong'ani gimin ua bolrangko den'pee a'ako talatna namen neng'beani ong'achim. William Pennni bimungchi pilak a'songko Pennsylvania ine mingaha. Uni orto, Pennni burung ba bolgrim. Ua a'songni skotong songjinma Philadelphia, uni orto jongada ka'sagrikani ong'a. Uko rikaniko, William Penn Londonko watna skangan chanchie tik ka'somanaha.

Lesson 29: Englishrangni Americao Songdongeani—II

Quakerrang Englando namen a'rikako man'beahachim. Uamang namgipa, tom'tomgipa aro Isolna kengipa manderang ong'a. Uamang da'o hajalni hajal Welsh, Irish aro Germanrangni dakchakachi Pennni a'ako nambatatna aro silbatatna man'aha, aro gipin Colonyrangni gisepo ua Colonyo, an'tangan songko sason ka'ani niamrangko dakaha, aro gam gngangbatgipa ong'aha. Penn bil ama dipet jakgitel ong'e sason ka'aniko aro ua songni manderang baksa nangrimgrikaniko rakiaha. Indaken bilsa ritcha sa ong'kujaon, Atlantic sagalni rikamjolo damsana agre a'song gimiko songdong-giparang dongaha. Iaragonikon dal'begipa United Statesni a'songko dakchengaha. Bon'kame ong'gipa Colonyara Georgia ongachim. Ua 1734 bilsiosa ong'aha. Ia salrang intalan songdong-giparangna bang'bata biaprangko nangangaha, aro uamang ka'sne ka'sne saliramchi sikhepcheoproangaha. Germanrang, Irishrang aro bimchip-gipa Franceoni katbagipa Huguenotrang a'ako o'na aro gamna cakchakaha, aro sorokrangko dake badinganirangko ong'katatna a'bachengaha.

Ua a'songo dongsogiparang burungni manderang ong'achim. Uamang dakgrikrongbegiparang ong'achim. Uano bang'a dingtang dingtang ma'chongrang gngang, aro ma'chong sa ma'chong gipin baksa dakgrikrongbeachim. Basakobara Englishrangko dakgrikna Francerangchi, aro basakobara Francerangko dakgrikna Spainrangchi chakrongachim. Indaken ruuta bilsirangna kingking Europeon

manderang ua songni manderang baksa dakgrike a'jak sokgrikaha. Ua salrango kenmangija warachakani, namen kengniniko dakani aro aiao inmanpile jokani bang'a katarang gnang. Ua songni manderang basakoba basakoba Europeni manderangni bi'sarangko cha'uange aldue dal'ataha. Tom'tombatani salrang ong'baahaon, Colonyrango an'sengbatani aro uibatani ong'baaha. Manderang songtangtangni nokrang gita, namgipa nokrangko rikna a'bachengaha. Nokni nambatgipa jakkalani bosturang, aro bolni me'dik sam'dik, aro cha'chak ringchakanirangko dakna a'bachengaha. Manderang ringrango re'ruraaha, aro nambatgipa ramarangko man'kujana kingking ua songni manderangni re'anirango gurerango gakate re'ruraaha, aro garirangko jakkalbaaha. Dingtang dingtang mi misirangko, chong'motan kil, mi, ta'maku, niri, gom, me'raku aro alurangko ge'aha. Jilanirangko England a'songoniko ra'baha. New England Stateso na'tok rim'ani mongsonggipa mingsa kam ong'aha, aro New Yorko jahatrangko rikani kamko bang'bata manderang dakroroangaha.

North Americani ding'batgipa biaprango kam ka'gipa manderangko man'na neng'beachim. Uni gimin England a'songoni saoba saoba Africa a'songni mitam manderangko cha'ue, mitamko togie ua songrango kam ka'atna rimangaha. Bi'sarangkoba cha'ubae paleaha.

North Americao Negro manderangko nokol ite palchengna Dutch manderang 1619 bilsio James chibimako chodobachengaha. Salgrochipako donggipa manderang Negrorangko mongsongde nokni nokolna rakiaha. Salgipengchipako donggipa manderanga uamangko mi, kil, ta'maku aro

nirini a'barango gamataha. Indake gamatna nang-
ani gimin ua salgipengchipako bang'bata mande-
rangko nangbataha, aro indaken nokol itani
bilakbatangaha, aro nokol itgiminrangko jakgitel
ong'atkujana kingking bariroroangaha.

Lesson 30: Rowan

America aro Spainni gisepe dakgrikani ong'-
ahaon United Statesni Presidentni pilakna skang
dakna nanggni kamara, Cuba chichango sipairangni
kosako bobil dake dakdilgipa Garciana uiatsona
nangani ong'achim. Jedakeba ia Garciaona
sokangna aro Americani mangsongako una uiatna
nangchongmotachim, maina uan American chake
Spain baksa dakgrikgenma dakgrikjawa uko uisona
nangchongmotachim.

Indiba maikai uanona sokangna man'gen? Sawa
uni dongramko uigen? Haida Cubani dakgrikram
biap burung jatchio pilak dak nok ba telegraph
officeoni chel'beasa dongegnaba donga.

United Statesni President an'tangni skako
Garciana maikai uiatna man'gen? Uui bang'bea
gam aro bil gnangoba uarang mamungnaba
choligijagipa gita ong'pilaha. Ua maikai Garcia
baksa agangrikna man'gen? Bangbea telegraph aro
telephoneni silitingrang dultokengoba aro uni
ge'etako maninakgipa mande hajalni hajal gnang-
oba ua ia on'tisa mangmangko aganatnan namen
jajrengbena nangaha.

Indiba mande saksa uona re'bae aganaha, 'Rowan
minggipa mande saksa gnang. Uade Garciako
nikena man'naba donga.' Rowanko Presidentni

mikkangona okamate, ua Garciako am'ena man'-genma ine uo sing'aha. 'Anga joton ka'e nigen,' ine ua aganchakaha. President ua mandeko aro uni aganani bewalrangko namnike uni jako Garciana sea chitiko on'aha. Rowan chitiko ra'e uko matbigilni monao chipe an'tang be'eno kang'-kareo gankape uoni ong'katangaha.

Sal brini ja'mano waljatchini andalao mande saksa Cubani rikamjoljol ringo choange badiaba biap damsao ong'oneaha, aro bakan walni andalan baksa gimaangaha. Anti gittamni ja'mano ua apsan mandekon Cubani rikam samsachi ringo choangengako niksotaiaha. Ia anti gittamni gisepon Rowan chugipa a'brirang, aro dikgipa burungrang, aro ma'manti kenani biaprangko bate re'angaha, maina a'song gimikni manderangan uamangni song aro jatskarangna bobil ong'engachim. Rowan pilak kenanirangko minggija Garciako nikeaha. Indake an'tangni kamko chu'sokate United Statesni Presidentona sokbapilaha. Uan an'tangni duk chakarangi gimin mamungba aganjaha, indiba ua bang'en dukko chakaha. Walo a'brini burungrango tuaha, salo bobilna ma'manti kenanirango ong'eng-gen ine an'ching uina man'a.

Lesson 31: Timur Jakcra

Pathan rajarangni sason ka'mano Turkestan gimik-
ko Timur minggipa dal'gipa raja sason ka'achim.
Uan changrogipa, sakgitchakgipa, mikkang dal'gipa,



mikron nikprotaisusu nikgipa aro ku'rang teng 'rak-
gipa mande ong'achim. Uni jaksirang dal'dala aro
ja'arang ro'roachim, indiba ua ja'kora ong'achim.

Uni giminan uko Timur Jakora ine mingrongachim. Uan songjinmao dongronggipa mande ong'achim. Uni sipairang gimikan ong'nasipile Tartarrang ong'achim. Uni giminan uko Timur-the-Tartar ineba mingachim. Ua ka'tong rakgipa aro ka'saninggijagipa ong'achim. Uan pilak tanggipa manderangni gisepo mandeko so'otbataha ine agana.

1398 bilsio Timur, Tartarrang, Turkrang aro Persiarangni bang'a sipai kotokrangko chimonge salgro saliramchini rama apgitokko Hindustanona naphaaha. Balwa ta'rabegipani rakdapa gita chacha ua Hindustanni kosako satpakangaha. Untal da'o bilsio 500 batangpilahaoba, manderang Timurni bimungko gualkuja; maina una skang aro uni ja'manoba pilakba ugita mandeko so'otgipa dongkujachim. Uororo India sason ka'soenggipa Pathan rajara Mussulman ong'achim, uni gimin Timur Mussulmantoromko gipatna re'baaha ine uina manja. Indiba uan ra'sekna aro mandeko so'otnasan mangsonge re'bahachim.

Ua an'tangni bang'begipa sipai kotokrang baksa Afganistanko Punjabona re'bae ka'sne ka'sne Delhi-china mikkangangaha, aro uni ki'sangchi ua manggisirang aro wa'al kame ching'gipa songrang-kosan donangaiaha. Delhini sepangona sokangon uni rim'gittanggimin manderang lak sana baten dongachim. Indita bang'bea manderangko nitimna uni manderangna amchakgijani ong'a ine nike ua uamangni giseponiko bilsio chi'bongana batgipa gimikkon so'ote galataha. Unsalo lak samang mandeko so'otaha ine agana.

Ia kengnini katako Delhio knasoahaoa manderangni gisiko kenan gape sigimin gita ong'pilaha.

Delhini raja aditana an'tangko guareni ning'o chip-changaha, indiba uan ja'mano goke dake an'tangni sipai kotokrang baksa ong'kataha. Unon Timur uamangko dakgrike amsrangaha, aro salbongana king king ka'saninggijagipa Tartarrang songjinmao re'roroe manderangko so'ote uamangni nokrangko so'aha. Unikoa bang'bea manderangko rim'gittange, aro gamrangko ra'seke, Himalayani ja'pajoljol Punjabona re'baemung Kabul gita Turkistanona re'angpilaha.

Delhiko bnekkningatange, ua India jabongasan mangmang dongangaiachim, aro uan jumang gitanan on'gangaichim. Indiba Indiani manderang ua gingting gingdalgaggipa daknanggijagipa Tartarrangko aro uamangko dilbagipa uamangni pamong, nina mikkang kengnigipa, mikron nikprotaisusu nikgipa, ku'rang teng'kranggipa, ja'a ro'gipa ja'korako mamung saloba gualjaha.

Lesson 32: Mose

Josephko Misor a'songchina palaton Israel manderangni Misor a'songchina ka'sneka'snesokangani chol ong'aha. Uamang Josephni tangmiting salrang gimiko, aro Josephni ja'manoba, uko uigipa rajani tangengmiting salrangode Israel manderang an'senge suk ong'e dongna man'achim. Indiba Josephko uigijagipa mandeni raja ong'ahaoa, uamangni kosako duk on'na aro uamangko nokol itna a'bachengaha. Ja'mano uamangni jelgni aro bilakgni cholko champengna raja mangsongaha; maina uamangko nokol ite dukko on'beengoba, uamang bate bate jeloroe bilakrorobaengachim.

Moseni atchimiting salrango Israel manderangni
gisepo atchigipa me'asa sakantikon atchiarion so'ote
galchina raja pilak an'nigiparangkoge'etaha. Indak-



en me'asa bi'sa sakantikon atchiarion so'ote galenga
chim. Indiba Mose atchiahaon, ua dingtangmancha
nitoani gimin uko so'ote galjana gita uni ma'gipa
una ka'sachake, uko ja gittamna kingking donnue
alduaha. Ja gittam batangahaoa, uni ma'a uko
donnuangkuna man'jawaha ine nike, petrako wate
uni ning'o uko donemung, saoba nikgipa ka'sachak-

gipa Misor manderangba uko ra'e aldunaba donga ine chanchie, chibima rikam tilu grimo galeaha. Ua bi'sana mai ong'gen uko nina ine uni abitanggipa chel'ao donge uko nitimaha. Unon Pharaoni demechik an'tangni nokol me'chikrang baksa chibima rikamona rona re'baemung uko nike, uko ra'echina uni nokol me'chik saksako watataha. Unon abitanggipaba an'tangni nitimramoni ong'-katbae ua bi'sana sok kane aldugipa me'chikko nangode ua am'e on'na man'gen ine rajani demechikna aganeaha. Rajani demechikba am'e on'china ge'etoe, ua uni ma'gipakon rimbae on'eaha. Indake Mose Pharaoni demechikni depante ine mingako man'e an'tangni ma'gipani sokchin alduako man'aha. Indiba uni ma'a, pa aro abitangna agre pilakan uko Pharaoni demechikni depante inesa uiachim.

Lesson 33: Shah Jehan—I

Shah Jehana Turkna bate Rajput ong'batachim. Uni ma'gipa Rajput aro uni pagipara tong'sa Rajput ong'achim. Ua Mogul rajarangni gisepo rasong man'begipa ong'achim. Uni sason ka'ani bilsa 30 ong'mitingo ua Indiao nambatgipa songjinmarang, raja nokrang, goprang aro olakiani nokrangko rikaha. An'tang baksa singhasonko ra'sekgrikna pilakba dongjana gita ua raja ong'arion ka'saninggija dake an'tangni jonggipa aro an'tangni gritangrangko so'otattokaha.

Shah Jehan indake ka'saninggija dake an'tangni sason ka'aniko a'bachengahaoba, ua an'tangni songko namedaken sason ka'aha; aro an'tangni pagipa Jehangirna bate nambatgipa raja ong'aha.

Ua aratgipa aro chuko namnikgipa ong'jachim.
Shah Jehanni jikgipara Nur Jehanni namchiktang
ong'achim. Uni bimung Mumtaz Mahal. Uan
nitogipa Persia me'chik ong'achim. Ua an'tangni

segipana namen ka'sabeachim, aro bia ka'ani
ja'mano bilsa chibri dongrimahaoa, uni siani sal
sokaha. An'tangni pal sakgipin me'chikko kimrik-
jachina, aro an'tangni bimungko pangnan tange
rakina gita an'tangko gopramni kosako nokko rike
donchina sinasion ua an'tangni seg'ipako mol'mol-
angaha. Segipaba mikrono mikchi jingjeng jingjeng
dake an'tangni jikgipani agananga gita dakna
ku'rachakrikaha, aro ja'mano uandaken dakaba

dakaha. Ua jik gipinko kimrikjaha, aro uko gopramni kosako a'gilsakni gisepo nitobatgipa aro gamchatbatgipa gopram Taj Mahalko rikaha. Uan Agrao Jamuna chibimani rikamo donga, aro ua da'oba gitalsraksrak dongaienga. Uan grikgipa bokgipa marbolni ong'a, aro ning'chi gamchatgipa ro'ongranko on'dapa. Uko rikna bils kolatchi nangaha, aro tangkaba lakkolatchi koros ong'aha.

Shah Jehan Jumna Masjid ba Delhini Mussulmanrangni olakiani nok dal'gipako, aro Agrani Mati Masjid ba muktani olakiani nokkoba rikaha. Uaranga a'gilsako nambegipa olakiani nokrang ong'a.

Salgroni India mingsinggipa nokrangko Shah Jehan rajani rikengmitingo, uni degipa Aurangzeb Deccanko dagrike amengachim. Ua pilak Mussulmanrangni songnokrangkon amtokaha, aro kajinako on'china draataha.

Lesson 34: Shah Jehan—II

Shah Jehan rajani sason ka'mitingo East India Company ine minggipa English badinggipa mandarang salaram rikamo donggipa Madrasko man'aha aro uano Fort St. George minggipa kilako rikaha. Uamang Bengalo, Ganges chibimani bibra sepango Calcuttani salgrochi mail 25 mang chel'gipa Hugly minggipa biapo ge'sa karkanakoba dakaha. Shah Jehanni depante sakbri dongachim. Uamangni gisepo dal'batgipako Dara mingachim. Dara ken-gijagipa, nitogipa, ka'tong ka'sachakgipa aro jak-sramgipa, indiba gaora de'gipa aro sengnapgijagipa ong'achim. Ua Akbar gitan Hindurangna ka'sagipa

ong'achim. Uni gimin dal'dalgipa Mussulmanrang uko namnikjaha. Gnigipa degipa Shuja, uaba kengijagipa aro changgipa, indiba an'tangni atchutang Jehangir gita chu aro ma'manti kusi ong'anirangko namnikgipa onga'chim. Gittamgipa 'degipa Aurangzeb, uan bilko man'gipa, chalakigipa, kengijagipa aro sapgipa general ong'achim. Ua Mussulman toromko namedaken manigipa ong'achim. Sason ka'ani jrimgipa kamrangko ua ra'na sikjachim, indiba ua toromigipasan ong'na sikaia, aro uni sal gimikkon Isolko olakiesa re'atna sikaia ine ua an'tangni jonggipa Muradan aganaha. Ua uko raja ong'atna dakchakgen ineba aganaha. Murad chu ringna aro sikar ka'na namnikgipa ong'achim. Ua Aurangzebni aganako bebe ra'aha. Uamang sakantion sipai bang'begipa kotok gnangchim, aro sakantian a'song damprakni sason ka'gipa ong'achim. Dara Delhio, Aurangzeb Deccano, Shuja Bengalo aro Murad Gujarato sason ka'achim.

Shah Jehan bilsil kolatchi raja ong'ani ja'mano, uni bilsil sotsni ong'ahaoa saaha. Ua sigen ine chanchiaha. Uni gimin uni depante sakbri rang'san uni songnokna dakgrikana a'bachengaha. Uamangni gisepo dakgrikani bilsil bongana kingking ong'aha. Bon'kamao Aurangzeb pilak gipinrangko ame an'tangko raja dakataha. Ua Dara aro Muradko so'otaha. Shuja Assam rajaona katnapaha, indiba ua uko aro uni dedrang gimikkon so'otaha. Shah Jehanko bilsil snina kingking patoko chipe donaha. Indake Shah Jehan an'tangni bitchri sata gitan biteko raskaaha; maina ua an'tangni raja ong'chengon an'tangni pagipa Jehangirni kosako bobil dake chakataha, aro an'tangni jonggiparangko aro uamangni dedrangko so'ottokaha.

Skanggipa Mogul raja sakgni'oni ja'mangipa
Mogul rajarang namen dingtangrik ong'beaha.
Babar an'tangni degipana janggitangko on'aha.
Humayon an'tangni janggiko so'otna am'gipa an-




tangni joggiparangko pilnipil kema ka'aha. Shah
Jehan aro Aurangzeb an'tangtangni pagiparangni
kosakon bobil dake chakataha, aro an'tangtangni
joggiparangko so'ottokaha.

Lesson 35: Sagal

A'gilsako a'ana bate chian bang'bata. A'gilsako
badita biaprang chini kosako nae dongenga una
bate chini ning'o donggipan changgittam bata. Uni
gimin a'ana bate chian bang'en bata. Indiba ua
chirangko dingtang dingtang uina gita, uarangko
bak dake dingtang dingtang bimungrangchi minga-
ha. Ua bakrangkon sagal minga. Sagal namen

apalbegipa chi ong'a. Sagalo mamungba dong-pengani dongjani gimin balwa namen ta'rakbea. Aro balwa ta'arakani gimin sagalni chi pokpekbea, aro chipakkore satbea. Sagalni chiko changsa pokpekatahaode, ua ruuta salna kingking donga, aro



bate bate pokpekroroange dal·dal·begipa chipak-koreranko ong'katata, aro indaken basakoba basakobade chipakkore dotprakan bewal a'bri dotprak gita ong'angpila. Indake chipakkore satbemitingo re'na namen kenbeani ong'a. Dal·dal·begipa sagalni jahatrangba, ta'rabegipa darerango rengrengpakni gitchoa gita dakangaia. Sagalko re'mitingo dram a'samko nikwatna man'ja. Bondor ge'saoni ge'gipinona sokjana kingking kaani biapba dongja. Wal sal dondikgija chona nangaia.

Sagalni chi kari nangbea, ringna namja, grok-samang ringode ka'sittangpila. Uni gimin ringna dingtangmancha kari nanggijagipa chiko chu'ongna gita jahatni dal'gipa pokkrio ko'e ra'bita. Basakoba maibakai jahat dubiode, manderang maibakai ringo gakate jokna man'oba, ringani chiko ra'e katangna man'jaode, chini gimin namen duk man'bea, aro chi ringna man'jae sipila.

Sagalni kari nanggipa chichi auode, aro sagalni kari gnanngipa balwako rang'sitode an'senggijagipa aro bilgrigipa manderangna an'sengani aro bilakani ong'a. Uni gimin be'en an'sengjae bilrigipa manderang adita salrangna' sagalchi re'ange rona namnikronga.

Lesson 36: Miranda

Changsao Mediterranean sagalni a'sal grigipa chongipa a'bimandu chichang ge'sao mande sakbri mangmang dongachim. Uamangoni saksu budepa gisik gnanngipa Prospero, sakgipin uni nitogipa demechnik Miranda; saksara uamangni nokol Caliban ong'achim. Uamangna agreba, Ariel minggipa Prosperoni sakgipin bebegipa nokol dongachim. Indiba pangnaba uko mikronchi nikna man'rongja, maina uan saksu *pori*, chong'motan mite ong'achim. Ariel nokgipana namen ka'sabegipa aro dakchakbegipa ong'achim. Changsao ua chichango donggipa montol dakna man'gipa Sycora minggipa saksu me'chikni pine bolni ning'o Arielko chipchange donako uienba uko jokatahani gimin Ariel nokgipana namen ka'sabeachim. Caliban ua montol dakna man'gipa me'chikni degipa ong'achim.

Sal sao Miranda balwa ta'arakani gimin pokpek-beenggipa sagalchiko niaton, duko ga'akenggipa jahat ge'sako nikataha. Pagipa sagalni pokpek-bearangko tom'tomatna man'a ine uie, Miranda ua sagalni pokpekako tom'tomate, jahatko dukoniko jokatchina pagipako mol'molaha. Ua an'tangan uko ong'atenga ine pagipa una aganchakaha. Aro ua jahato donggipa manderang saksaniba janggide gimajawa ine ka'dongate uko ka'dimeataha.

Unikoa Prospero Mirandana aganaha, 'Da'o bilsichigni ong'angaha, anga Milan a'songni Duke ong'achim. Anga an'tangni gamseng aro rasongni gimin mamungba simsakja, angni de baksa damsan donge uni mikkangko nie angni ki'taprangko poraie rona nam'akon anga kusi ong'nikbata, aro katchanikbatachim. Uni gimin anga angni pilak gamsengrangko angni jonggipa, chong'motan, nang'ni wanggipa Antonioni jako on'tokahachim. Indiba nang'ni wanggipa mikbokbegipa ong'ani gimin uko chu'ongnikgija angni a'a chi gimikkon man'gopna skaha, aro ua a'a chirangni nokgipa ong'na gita una dakchakchina Naplesni rajaona re'ange uo mol'molbeaha. Ua a'a chirangko man'e on'ode, una bang'a gamkon on'na ua ku'rachakaha. Naplesni rajaba uochacha angko namnikjaengani gimin, uaba Antonioni mol'mola gitan una dakchakaha. Indaken wal sao angni bobilrang an'chingko cha'uangemung gitchorakgijagipa, be'gipunasigipa jahato chipchange sagalo gitchoataha. Angna ka'sagipa mitam ripengrang nikrikchangesa anga angni kitaprang mangmangkoba man'bapaaha. An'chingni jahat ia mande grigipa chichango skatea intal da'alona kingking nang'mung aro ua ki'taprangsan angni ripeng aro

ka'dimeani ong'enga. Da'alo anga an'tangni changa-chi angni bobilrangko amaha. Angni bobilrang pilakan da'o ua jahaton dongenga, aro uamang bakbakan angni jako ga'aktokgen.

Prospero Mirandana an'tangni dukni katarangko aganengmitingon Ariel an'tang nokgipani mangsongako uie, jahatko a'ga rikamona salbae, Naplesni rajani depante Ferdinandko Prospero aro Mirandani dongram nokona rimbaha, Aro pilak gipinrangko chichangni gipin samsachi tusiate donaha. Miranda Ferdinandko nikon una ka'saaha, aro Ferdinandba Mirandako nikon una ka'sabeaha, aro Mirandako man'jaode a'gilsako sukan griwa nie chanchiaha. Prospero uamangni ka'sagrikako nike namen kusi ong'beaha.

Uachi sagal rikamo galako man'e tusinggiparangni gisepe rajani jonggipa Sebastian aro Prosperoni a'a chiko ra'sekgipa Antonio mikrakchengemu rajako so'ote galna ku'mongengachim. Indiba rajako nitimchina Prosperoni watatgipa Ariel uko uie, ka'mao sea gitko, Prosperoni ki'taprangko pa'e, ka'sne ring'e uko mikrakchangate, uamangni so'otna am'ako bingbangataha.

'Nang mikkangon so'otna ne ku'mongengakode Uigijan tusiaengbo na'ade indake.

Jokatna skode na'a gipinni janggiko,
Gisik rake mikrakatbo na'aba an'tangko.'

Unon uamang pilakan mikraktokoa Ferdinandko nikjani gimin uko am'na re'chakattokaha. Iachi Arielba uamangko uiatgija dilbaemung Prosperoni dongram a'palo, Prosperoni ariko sale donaona kingking rimbaha. Uamangni uano chadenge jaja jiji dakengmitingor Prospero an'tangni ra'bitbagipa namnambegipa ba'rarangko gane ong'katbae ua-

mangna mikkang pa'eaha. Unon uamang Prospero nike kratchae dil'dil ong'aha, aro uni me'mangko nikaha inesa chanchiachim, indiba Prospero an'tangni katarangko agane uamangna uiataha, aro uamangni namgijarangko kema ka'aha ine agane uamangko ka'dongataha.

Unikoa Naplesni raja an'tangni depanteko ua chichango gimaataha ine aganaha, aro Prosperoba aganaha, 'Angaba angni demechikko da'osan gimaataha.' Iako aganemung Prospero uamangko kuturi ge'saona dilangaha. Uano uamang Ferdinand aro Mirandako apasn asonge *Chess* kal'engako nikeaha. Naplesni rajaba Ferdinand aro Mirandani ka'sagrikako nike namnikaha, aro Ferdinand aro Mirandako bia ka'atna ine uamang pilakan damsan songtangchina chochakatbaaha. Arielni daka kamrangna kusi ong'bee Prospero an'tangtangni re'chakatna skangan uko jakgitel wate donangaha.

Lesson 37: Gisik Gnanggippa Richardni Agana

Badiaba raja raiotrangni somoini bak chikungni bak sani pal gitakoba an'tangni kamna jakkalode, raiotrang pilakan ku'cholsan uko namgijagipa raja ine intokgenchim. Indiba aratara an'chingni gisepo banga mandeni bang'a somoikon cha'uronga. Arata be'enko bilgriata, aro janggi tangani bilsiko kan'dikata. Arata be'enko maram cha'e kamna choligijagipa dakata. Indiba bimchipa uandake ong'ja. Na'a an'tangni janggitangko namnikjama? aganboching. Namnikode mainasa na'a salko gimaata? Salanba janggi ong'a. Gisik gnanggippa Richard agana, 'Nibo an'chinga, nangana agre badi-

tan tusironga. 'Tusigipa perude do'oko cha'manja'. 'Nibo siangmanahao gopramo bang'en tusina nanggen, aro unon mamungba champengani dongjawaha.' Indide somoi pilakna bate gamchatbatgipa ong'ode, uko gimaatara namen namgijani ong'jama? An'chingni gimaatgimin salko badiaba salo an'ching man'pilna amgenma? Ia dongenggipa bilsini re'angmanahaoa, ua basakoba re'bapiltai-genma?

An'chingni bakronikbegipa sal, chong'motde bakroade ong'ja. Uan kan'dikchongmotbea. Na'a bimchipgipa ong'ode ua namen kan'dikbea, aro bakroja ine na'a nikgen. Aratara salko bakronikata, indiba bimchipara uko kan'diknikata. Uni gimin chakatbo, kang-kare kabo, aro man'dapani kamko dakna a'bachengbo. Joton ka'e gisik nange kam ka'ode gam baria aro duk chel'anga. Arata kratcha'e chel'e katanggen, aro ua mamung saloba re'bapiltaina kadongjawaha. Arata pilak kamon mandeko amgijagipa ong'ata, indiba bimchipara uarangko dakna altuata. Aratgipa game cha'gipa mandeni nokkingo ampang gri aro sarao samsi dika.

Sal chue chakatgipa kraa somoio kamko matchot-na amja. Walangpiloba uni kam matchotja. Uni gimin gisik gnanggipa Richard indine agana, Aratara ka'sinbee re'ani gimin cha'asia uko srappingbea. Na'a an'tang kamko kang-kare kae ka'bo, kam nang'ni ning'o ong'china, indiba na'a an'tangko kamni ning'o ong'na on'nabe.'

Waltinge rogija seng'gnang chakatgipa mande aratgijagipa, gam aro gisik gnanggipa aro an'seng-gipa ong'a. Seng'gnang tue pringni chakatgipa mandeni be'en an'senga, aro gam aro gisik gnanggipa mande ong'e sukko man'a. Kam

ka'gipa mande cha'anikoba man'a ine Sastrooba aganjama?

Duk griode sukba dongja,
Kamna an'pildatna nangja.
Jokan angna dakchakgipa,
Ong'ja anga aratgipa.

An'ching aratgija bimchipode mamung saloba cha'a ringa aro gana chinani gimin nangani ong'jawa, maina kam ka'gipa mandeni cholgugao cha'asia neu-ena man'naba donga, indiba uno napsrangna man'rongja. Bimchipgipa groko chota, indiba aratgipa uko bariata. Na'a banoniba dona gamko man'kujaoba, aro pilakba nang'na an'tangni gamko see donanga dongjaoba, uani giminde mamungba ong'ja. Maina kamna gong'ara rasong man'ani ja pang ong'a, aro gong'gipana Isol pilak nangarangko patia. Uni gimin bimchipe kamko ka'osa nama.

Da'alo nang'ni dakna nanga kamko da'alon dakbo, maina knalo mai champengani ong'gen uko uisoja. Knalona dongchina ine bang'a manderangan aganronga, uni gimin Richard iako aganenga, 'Da'alan matchotatna nanggipako knalna donsonabe.'

Na'a sakgipinni ning'o kam ka'gipa ong'eba nang'ni jako kam bang'engmitingo ja'ko jakko tom'e asonge dongaiode, aro unochacha nang'ko nang'ni nokgipa nikdikeode na'a kratchajawama? Indide nang'ni nokgipa dongeba an'tangni aratana kratcha'piljama? Maina bang'a dakna nanggni kamrang donga aro kam bang'engoba arate roade nitoani ong'ja. Na'a an'tangna, nang'ni jik dedrangna, songtangna aro rajana nang'ni dakna

nanga kamrang bang'bea. Nang'ni janggi tangi gimiko na'a uarangko matchotna amjawa. Kamrang bang'beani gimin na'a uarangko matchotna amjawa beben, indiba na'a watgalgija jotking dakangode baditan chu'sokna man'a, uko na'a nikgen, maina kam rakbegipa aro dakna amgijani ong'oba na'a uko dakrongode ua nang'na jrimjawa.

Aratgipa mande kam ka'na sikja. Joton ka'e pangnan on'tiprak kam ka'ronggipa mande a'bri gita ong'gipa kamkoba matchotna am'a Dal'begipa Rome songjinmako sal sanon rikahachimma? Collegeo poraigiparang dal'dalbegipa ki'taprangko salprakon gisiko dontokama? Uamangba salanti on'tiprak dakangrikikesa man'a. Gisik gnanggipa Richard agana, 'Tingtotaigipa chi mangmangba pangnan ga'akode, ro'ongkon cham'ata. Kejurni bitchiba tingtotprak mangmang ga'akari basingko gapata. Narikel bikapni bisring kniding gita dakaioaba, bang'ako tom'dake budu sakode uchi dal'begipa jahatko salna man'a. Chon begipa mese menggotchi on'tiprak on'tiprak tine dal'begipa jahatni buduko tinsotna man'a. Ka'sne ka'sne den'achi dal'begipa giting bolkoba be'atna man'a.'

Uigipa mande dal'begipa ong'oba bimchipa, aro kam ka'na kratcha'nikja. Indiba uigijagipa manderang chonbegipa ong'oba, aro cha'ani grioba arata aro kam ka'na kratcha'nika.

Lesson 38: Francoe Dakgrikaona A'chikrangni Re'angani

Bilsi, 1914 ni August jaoni 1918 ni November
jaona English aro Germanrangni gisepo dal'begipa

dakgrikani ong'aha. Ua dakgrikao an'chingni raja-ko dakchakna A'chikrangba Francechi re'china okamako man'aha.

Bilsil 1917 ni April jao Garo Labour Companyna manderangko chimongna a'bachengaha. Aro Turao manderangko sak 1000 na baten chimongman'ahachim. Indiba Francechina re'na hukum sokningjani gimin, Turao jadokmangna baten sengna nangaha. Turao sengmitingo bang'a manderang ja'klong soani gimin jegalako man'aha, aro mitamrang kat cha'a, kasi cha'a aro gipin gipin saarang dongani giminba jegalako man'aha. Indake segalen Francechina re'chakatani sal sokon gimik sak 500 mangsan re'angna man'aiaha.

Bilsil 1917 ni August jani 13 salo 69th Garo Labour Company Turaoni re'chakate, Turaoni Rowmari gita, Calcuttani Garden Reachona re'angchengaha. Gauhationi Nepali Recruitrangba Achikrang baksa Rowmarioni Calcuttani Garden Reachona re'angpaaha. Aro Garden Reacho pilakan ja samangna agrean dongaha.

Garden Reachoni reilo gakate Bombayona re'angaha. Bombayonisa jahat dal'gipao gakate, Indian Ocean, Red Sea aro Mediterranean Sagalko choe Marseillesona re'angha. Ia song dal'gipa ong'a, aro a'song sagal rikamo donga. Ian Franceo nikchengegipa song ong'a. Sagalrangko choangmitingo chi pokpekani gimin adita manderang saaha.

Marseillesoni uamang dakgrikramona kam ka'na, Marseillesni La Valanteeno Indian Labour Base Depoto sal bonga donge dakgrikramona re'chakataha. Ding'gipa a'songoni sin'gipa a'songona sin'kari a'bachengo sokehani gimin A'chik man-

derangoni bang'an sae Base Depoto dongrikaha. Re'angmitingo salgipeng jolo dakgrikasok bakugijagipa biap, gittim aro songjinmarangko nitoriri nikangaha. A'barang, barirang aro nokrang nito-beachim, aro songjinmarango bijolini chakirang ching'chipchipaiachim. Indiba dakgrikani biapona sokon, song galchipa, nok be'chipa aro mande donggijakosa nikaiaha. Ua biaprango sipairangna agre gipinrangko nikna man'jachim.

Turao dongmitingo saksa, aro Garden Reacho dongmitingo saksa, sagalko re'mitingo Alexandriao saksa aro Franceo dongmitingo gimik sak 55 A'chikrang sae siaha. Ia sigimin manderangko mande ra'e uamangni, dakgimin nama kamrangko gisik ra'na ine Turao gisik ra'atani ge'sako ro'ongchi rike donaha. Ua ro'ongchi rikgimino sigiminrangni bimungrangko sea gnang. Uko Turao nikna man'a.

Lesson 39: Franceni Dakgrikramo A'chikrangni Kam Ka'a—I

Franceni dakgrikramona sokoa, walo chakirangni seng'akon nikna man'jachim; maina walo wa'al ching'ako nikode bilgipa bobilrang bilbae boma galdaprongachim. Indake ong'arangko nike mitam kenahachim. Mongsongde kaman goani gam'ako knaon kenbachim. Aro dakgrikramoni chel'aosa kam ka'na nanggen ine skangde agane rimbaachim, indiba da'o dakgrikani sepangonan rimbasrangaha ine sintee duk man'ahachim. Indiba ia kena aro sintearang dikdiksanasan ong'aiaha, ja'mano kamanrang gam'oba, aro bobilrangni salgio bilako

nikoba kenjaha. A'chikrang Achileground minggipa a'kaweni Beaucourt minggipa gittim galchippo tambu ping'e sal gittam dongaha. Iano botlong aro doktarangko rikaana agre gipin kam dongjachim. Ia gittimo bari bang'a, mongsongde pear bolni barirang. Pear bite minmiting ong'ani gimin A'chikrang skatang ake cha'achim.

Adita salni ja'mano uanoni Peronne, songjinmaona jitangaha. Iano 1917 November 2 tarikoni 1918 January 31 tarikona kam ka'aha. Kam mingsasan ong'gija, dingtang dingtang kamrang gnangchim. Mitam reil stationo siliting, sil bu'su, boltong, dokta, ma'manti to aro cha'ani bosturangko reil gari, motor gari aro gure garirango gataha. Mitam a'a cho'a, mitam ripinge donramo kam ka'e reil garirangoni boltong, tin, dokta aro maiba maiba bosturangko bikote uarangko gure gari aro motor garirango ripinge donramona watataha. Pilak kamrangna bate silni kam namjabatachim. Maina sin'kario pilak silan surichikani gimin rim'nan man'jachim. Jako kruanirang dongjaode chola jakko salbiltingesa silko de'tomrongachim, indaken chola jakrang bakan grinaiachim.

Franceona sokangon October jani bon'achibara aro sin'na a'bachengbamiting ong'achim. Salgrojolo suuri onna a'bachengaha. Mitam mitam mande-rang re'angmitingo be'entangtango ding'e rakina simsakjae, aro saoba saoba ba'rako chu'onge man'jae walo sin'a napaha. Reil garioni ong'onarion saoba saobade gitilwatataha. December jao suuri bilonge onna a'bachengaha. Suuri onmiting chachao name sin'srangjachim, suuri onani adita sal ja'mano India a'rankario an'cheng aro a'dimurangko balwa balponga gita suuriko balpongosa aro suuri

tin·kaahaosa sin·batachim. December aro January jarango sin·beani gimin A·chikrang ritcha sana bate salprako saaha. Saksade pringo saa namkalani gimin kam ka'na re'angachim, indiba kamchini sokpilbaarini mi cha'mano a'tipon siaha. Indaken A·chikrang sin'a songo kam ka'na man'jawa aro uamangna sin'dugaa ine Palestinechi, ong'jaoba Indiachi watatpilna hukum·sokahachim. Indiba uamangni kam ka'ani biapona gipin dol sokbakujani gimin adita salna sengaha. Unon saarang komi-angpiltaihani gimin hukumko ra·pilaha. Watat-pilnasiako knae uamang namen duk man'aha, maina rajako aro Governmentko uamangni dak-chakna re'angade indin ong'aigen, uamangde krat-chagen ine A·chikrang aganachim. Robibar salrango chuti man'e gilja ka'e Isolo bi·rongaha. Unon saa ding'arang komiangaha, aro uamang ku'rachakako matchote kam ka'na man'aha.

Peronneoni gipin dakgrikigijagipa biapona uamangko jitattaiaha. Ia biapo ja gni kam ka'mano, Germanrang Allirangko sikchepbataiaha. Sipairang dakgrikana agre gipin kamrangko ka'na nangjachim. Germanni sikchepbaani adita sal ja'mano A·chik dolko trench cho'na rimangaha. A·chikrang ja gnina trenchko cho'aha, aro silitingrangko sring-pengsoaha. Saheb sipairang A·chikrangko kamoba ongchong, maiba gipin maniarangni giminba ong-chong pilak gipin manderangna bate namnikbatachim. A·chikrangko bilsa 1918 ni May jani bon'nasio trench cho'aoniko songtangtangona rimbapilaha, aro Julyni 16 salo a'songtangona sokpilaha.

Lesson 40: Franceni Dakgrikramo A'chikrangni Kam Ka'a—II

Dakgrikramo dongmiting, ma'manti dakgrikani jakkalanirangko nikaha. Dakgrikani jahatrangko, dal'dalgipa kamanrangko, kolni slairangko aro tankrangko nikaha. Ia nikanirangni gisepo chining joljol chogipa jahat, chong'motan submarine aro bilani kolrang aiao inmanbatani ong'a. Tankrang motor garirang gita gong'rakjaoba motor garirang-na bate a'bri a'kongrangko aro rimilgipa suurini ramarangko re'na man'bata. Bilgiparang rokom gittam donga, chongmotan Aeroplane, Sea-plane aro Air-ship. Iarangni gisepo Air-shiprang dal-dalbatgiparang ong'a. Sea planerang chio motor-boatrang gitan ta'rake re'na man'a. Aeroplanerang a'aoba a'a ga'nangaode motor garirang gitan ta'rake re'na man'a. Iarangni gisepo aeroplanerangko dakgrikao jakkalbata. Uarang bilgipa do'orang gita skatang bildona aro bilonna man'a. Salgio dakgrikode do'reng ba do'karangni sugrika gita nikaia, aro chubeahaode aeroplane gita nikjapila, do'reng atore gitasa nikpilaia. Bobilrang *Observation Baloon* minggipako so'na joton ka'bea. Wa'al kamahaode ning'o donggipa mandekoba kamchapa aro basakobade a'aona ga'akonbaa. Chol man'engode wa'al kambaengmitingon silitingko malone kata aro indaken bang'an janggi jikaniko man'a.

Dakgrikramosan ong'aigija skia man'gipa song-rango he'enni an'senganina simsakbea. Indiba dakgrikramo simsakbata gita nika. Pilak dolnan doctorrang donga. Pilak atipon paikanarang donga. Wal sa wal gni tuna, ba sal sa sal gni

dongna nangaioba paikanakode taria. Trench chomitingo dikdiksa somoina mangmangba a'kol cho'esa apal re'na nanga. A'tipantion me'kamko, ba mi bijak cha'e jaksuani chiko pake galna dingtang a'kol cho'e dona. Bilati dut ba maiba maiba cha'anini tinrangko ba grengrangko galbingbangna on'ja. Uarangko so'ani biapona ra'ange so'e gala. Ong'jaoba a'kol tu'e cho'e uarangko dape gala. Pilak a'tiprangko nirokgipa *Red Cross* dolni manderang a'tipantiona re'roroe biap rongtalama rongtalja nirokronga. Auna man'jani gimin maiba maiba pari, ba kat, ba kasi cha'nasiode pilakkon samni bibao chakatronga. Aro ba'rarango tikpitrang bang'ode chi ding'ani bibao ba'rarangko ritatronga. Indake uamang cha'ani aro be'enni gimin simsak-beani gimin dal'begipa bobilrangko warachakna aro kamrangko chu'sokatna man'bataha.

Dakgrikgipa sipairang bobilko warachakna nam-en krengebeaha. Mikka waoba, balwa rakoba, suuri onoba apsan kamko ku'monge nangrime ka'beaha. Pilakna bate trencho donggipa sipairang duk man'bataha. Uamang trencho chi ja'sku ba kang'kare ong'oba an'tangtangni biapko watgija rakina nangachim. Sipairang gitan ong'nasie kam ka'giparangba duk suk man'pagipa ong'aha. Pilak nanga kamrangko kam ka'giparangni jakchi ka'achim aro sipairang dakgrikangachim. Pilak nanga korosrangna raja aro Government chanchie nanganirangko koros ka'atachim. Ramako champengana agre cha'anirangko bang'en chu'onge watatachim, aro pilak dolba koros dongjae ba cha'aniko man'jae sia dongjachim. Raja aro Government dakgrikramo donggiparangna badita ka'sara aro simsaka uko aganan amja, British

sson pilak jatni tom'tomaniko aro silroroaniko
on'a. An'chingni raja dal'gipa tangbangchina.

Lesson 41: Simano Atchiani

1. Simano atchia ine A'chikrang intoka,
Me'mang a'song donga ine bebeba ra'toka.
Sigipana A'chikrangde matchuko den'ata,
Gankape re'angchong ine ripokko tetata.
2. An'tangna den'ako me'mang matchuko
moange,
Tetatgimin ripokrangko kolame ra'ange.
Matchu kae neng'takramko matchu boldak
karam,
Ripok sike neng'takramko me'mang gana
sikram.
3. Indi ine A'chikranga mingsinga minggama,
Me'gamni a'songo ua da'oba donga ina.
Agantoka Napak songo me'mang a'song
gnang,
Unonasa re'angtoka sigipa manderang.
4. Sepangko re'ode ua me'mangni a'songko,
Kinatoka sigipako minge okamako.
Napak songni manderangde a'jakba rimgrika,
Ma'maanti kamrangkoba ka'eba on'grika.
5. Uano indake asong songdonge me'mangrang,
Unonisa re'baemung atchia manderang.
A'jong rori atchiaha A'chik manderango,
A'chik mande atchiaha A'jong rorirango.
6. Indakesa A'chikranga matchu man'pajajok,
A'chikrangni den'a matchu A'jongo gitichujok.

Da'ode sandie nibo iani ja'pangko,
 Namedake sandiode uigen bebeko.

7. Manderanga pil'nipilan atchibebegenchim!
 Atchisachi mai mai ong'a uko uigenchim.
 Bao a'song songdongbaa, bimunga mai minga.
 Badia a'songo aro katchia mai de'a.
8. Maia bimung mingachime uni ma'ko pa'ko,
 Gisiko rohigen ua an'tang bimungtangko;
 Nokma ong'achimma, ua nokolsa napama?
 Man'e cha'achimma, ua kangalsa ong'ama?
9. Nama namgijako badigita dakbaaha,
 Basik bilsina tangenba ua sibaaha.
 Iaranko mitam mitam gisiko dongenchim,
 Gisiktango dongakode aganna mangenchim.
10. Sing'e nibo manderangko aganna man'genma,
 A'song chiga katchi ma'chong u'mang mesok-
 genma?
 Saksaba dongjawa ine chanchia angade,
 Uaranko agantokna man'gipa mandede.
11. A'jakba rimgrika ine manderang agana,
 Iakoba chanchiode amja bebera'na.
 Ja'chi re'e mikchi nie jak dangdikgijade,
 Mamung kamba ong'na amja gisikarichide.
12. Sigiminna janggikosa me'mang ine minga,
 Janggiara ma lakesa gamna suna man'a.
 Uni gimang jak rima inaba ong'jasa,
 Manderangni unac agana katasa.

RAMKE MOMIN

